


史記

紀十之二





漢書門			
三	四	五	六
冊	架	函	號

內閣文庫			
三	五	六	漢
冊	架	函	書

內閣文庫			
番號	漢	5601	
冊數	30(4)		
函號	280	81	

四




周本紀下第十

北史卷之六

高祖世皇帝諱邕字彌羅突文帝第四子也母
曰叱奴太后魏太統九年生於同州有神光照
室帝幼而孝敬聰敏有器質文帝異之曰成吾
志者此兒也年十二封輔城郡公孝閔帝踐阼
拜大將軍出鎮同州明帝即位遷柱國授蒲州
刺史入為大司空行御正進封魯國公領宗師
甚見親愛參議朝廷大事性沉深有遠識非因
問終無所言帝每歎曰夫人不言言必有中武

成二年四月帝崩遺詔傳位於帝帝固讓百官
勸進乃從之壬寅即皇帝位大赦冬十二月改
作路門是歲齊孝昭帝廢其主殿而自立
保定元年春正月戊申改元文武百官各增四
級以大冢宰晉公護為都督中外諸軍事令五
府總於天官庚戌祀圓丘壬子祀方丘甲寅祀
感生帝於南郊乙卯祭太社己巳享太廟班文帝
所述六官於廟庭甲戌板授高年官各有差乙
亥親耕籍田景子大射於正武殿賜百官各有


差二月己卯遣大使巡察天下風俗甲午朝日
於東郊景午省輦輿去百戲三月景寅改八丁
兵為十二丁兵率歲二月役夏四月景子朔日
有蝕之庚寅以少傅吳公尉綱為大司空丁酉
白蘭遣使獻犀甲鐵鎧五月景午封孝閔皇帝
子康為紀國公皇子贊為魯國公晉公護獲玉
斗以獻六月乙酉遣御正殷不害使於陳秋七
月戊申以旱故詔所在降死罪已下囚更鑄錢
文曰布泉以一當五與五銖並行九月甲辰南



寧州使獻滇馬及蜀鎧冬十月甲戌朔日有蝕之十一月乙巳陳人來聘丁巳狩於岐陽是月齊孝昭帝殂十二月車駕至自岐陽是歲突厥吐谷渾高昌宕昌龜茲等國並遣使朝貢

二年春正月壬寅初於蒲州開河渠同州開龍首渠以廣溉灌丁未以陳主弟頊為柱國送還江南閏月己亥大司馬涼公賀蘭祥薨二月癸丑以久不雨宥罪人京城三十里內禁酒梁主蕭譽薨夏四月甲辰以旱故禁屠宰癸亥詔曰

諸柱國等勲德隆重宜有優崇各準別制邑戶聽寄食他縣五月庚午以南山眾瑞並集免今年役及租賦之半壬辰以柱國隋公楊忠為大司空六月己亥以柱國蜀公尉遲為大司馬分山南荊州安州襄州江陵為四總管秋九月戊辰朔日有蝕之陳人來聘冬十月辛亥帝御大武殿大射戊午講武於少陵原十一月丁卯以大將軍衛公直趙公招並為柱國三年春正月辛未改光遷國為遷州乙酉太保



梁公侯莫陳崇賜死二月庚子初頒新律辛酉
詔自今舉大事行大政非軍機急速皆依月令
以順天心三月乙丑朔日有蝕之景子宕昌國
獻生猛獸二詔放之南山夏四月乙未以柱國
鄭公達奚武為太保大將軍韓果為柱國己亥
帝御正武殿錄囚徒癸卯大雩癸丑有牛足生
於背戊午幸太學以太傅燕公于謹為三老而
問道焉初禁天下報讎言犯者以殺人論壬戌詔
百官及庶人上封事極言得失五月甲午朔以

旱故避正寢不受朝甲戌雨秋七月戊辰行幸
原州庚午陳人來聘丁丑幸津門問百年賜以
金帛又賜高年板職各有差降死罪囚一等八
月丁未改作路寢九月甲子自原州登隴山景
戌幸同州戊子詔柱國楊忠率騎一萬與突厥
伐齊己丑初令世襲州郡縣者悉改為五等爵
州封伯郡封子縣封男冬十月庚戌陳人來聘
十二月辛卯車駕至自同州遣太保達奚武率
騎三萬出平陽以應楊忠是月有人生子男而

陰在背後如尾兩足指如獸爪有犬生子腰以後分為二身兩尾六足

四年春正月庚申楊忠破齊長城至晉陽而還
二月庚寅朔日有蝕之三月庚辰初令百官執
笏夏四月癸卯以柱國鄧公竇熾為大宗伯五
月壬戌封明帝長子賢為畢公癸酉以大將軍
安武公李穆為柱國丁亥改禮部為司宗大司
禮為禮部大司樂為樂部六月庚寅改御伯為
納言秋七月焉耆國遣使獻名馬八月丁亥朔

日有蝕之詔柱國楊忠帥師與突厥東伐至北
河而還戊子以柱國齊公憲為雍州牧以許公
宇文貴為大司徒九月丁巳以柱國衛公直為
大司空陳人來聘是月以皇世母閻氏自齊至
大赦閏月己亥以大將軍韋孝寬長孫儉並為
柱國冬十月癸亥以大將軍陸通宇文盛蔡公
廣並為柱國甲子詔大冢宰晉公護伐齊齋於
太廟庭授以斧鉞於是護總大軍出潼關大將
軍權景宣師山南諸軍出豫州少師楊擲出軹

關丁卯帝幸沙苑勞師癸酉還宮十一月甲午
柱國尉遲迥圍洛陽柱國齊公憲營芒山晉公
護次陝州十二月景辰齊豫州刺史王士良以
州降壬戌齊師度河晨至洛陽諸軍驚散尉迥
帥麾下數十騎扞敵得却至夜引還柱國王雄
力戰死之遂班師楊擲於軹關戰沒權景宣亦
棄豫州而還是歲突厥粟特等國並遣使朝貢
五年春正月甲申朔以柱國王雄死王事故廢
朝乙巳以雄世子謙為柱國二月辛丑詔陳公

純等逆皇后于突厥景寅以柱國李穆為大司
空綏德公陸通為大司寇壬申行幸岐州戊子
柱國豆盧寧薨夏四月齊武成帝禪位於其太
子緯自稱太上皇帝五月己亥左右武伯各置
中大夫一人六月庚申彗星出三台入文昌犯
上將經紫宮入苑漸長丈餘百餘日乃滅辛未
詔江陵人年六十五已上為官奴婢者已令放
免其公私奴婢年七十以外者所在官私宜贖
為庶人秋七月辛巳朔日有蝕之庚寅行幸秦

州降死罪已下刑幸丑遣大使巡察天下八月
景子車駕至自秦州冬十月辛亥改函谷關城
為通洛防十一月丁未陳人來聘是歲吐谷渾
遣使朝貢

天和元年春正月己卯朔日有蝕之辛巳考路
寢命羣臣賦古詩京邑耆老亦會焉頒賜各有
差癸未大赦改元百官普加四級己亥親耕籍
田丁未於宕昌國置宕州遣小載師杜果使於
宋二月戊辰詔三公已下各舉所知庚午日鬪

光遂微日中見烏三月景午祀南郊夏四月辛
亥雩是月陳文帝殂五月庚辰帝御正武殿集
羣臣親講禮記吐谷渾龍涸王莫昌率月內附
以其地為扶州甲午詔曰甲子乙卯禮云不樂
喪弘表昆吾之稔杜蕢有揚解之文事世道喪
亂禮儀紊毀此典茫然已墜於地宜依是日有
省停樂庶知為君之難為臣不易貽之後昆殷
鑒斯在六月景午以大將軍辛威為柱國秋七
月戊寅築武功郿斜谷武都留谷津坑諸城以

置軍人壬午詔諸胄子入學但束脩於師不勞
釋奠釋奠者學成之祭自今即為恒式八月已
未詔諸有三年之喪或負土成墳或寢苦骨立
志一行可稱揚者本部官司隨事上言當加
弔勉以勵薄俗九月乙亥信州蠻反詔開府陸
騰討平之冬十月甲子初造山雲儼以備六代
樂十一月景戌行幸武功等城十二月庚申還
宮

二年春正月癸酉朔日有蝕之己亥親耕籍田

三月癸酉改武遊園為道會苑丁亥初立郊丘
壇壝制度夏四月乙巳省併東南諸州以大將
軍陳公純為柱國六月辛亥尊所生叱奴氏為
皇太后閏月庚午地震戊寅陳湘州刺史華皎
帥眾來附壬辰以大將軍譙公儉為柱國秋七
月辛丑梁州上言鳳凰集楓樹羣鳥列侍以萬
數甲辰立路門學置生七十二人壬子以太傅
燕公于謹為雍州牧九月衛公直等與陳將淳
于量吳明徹戰于沌口王師敗績元定以步騎

數千先度遂沒江南冬十一月戊戌朔日有蝕
之癸丑太保許國公宇文貴薨是歲突厥吐谷
渾安息等國並遣使朝貢

三年春正月辛丑祀南郊三月癸卯皇后阿史
那氏至自突厥甲辰大赦丁未大會百寮及賓
客於路寢戊午太傅燕公于謹薨夏四月辛巳
以太保達奚武為太傅大司馬尉迴為太保柱
國齊公憲為大司馬五月庚戌享太廟六月甲
戌有星孛於東井秋七月壬寅柱國隋公楊忠

薨八月乙丑韓公元羅薨齊人來聘請和親詔
軍司馬陸逞報聘癸酉帝御大德殿集百寮及
沙門道士等親講禮記冬十月癸亥享太廟丁
亥上親帥六軍講武於城南京邑觀者輿馬彌
漫數十里諸蕃使咸在焉十一月壬辰朔日有
蝕之壬子遣開府崔彥穆使於齊甲寅陳安成
王頊廢其主伯宗而自立辛未齊武成帝殂
四年春正月辛卯朔以齊武成殂故廢朝遣司
會李綸等會葬於齊二月戊辰帝御大德殿集

百寮道士沙門等討論釋老夏四月己巳齊人
來聘五月己丑帝製象經成集百寮講說封魏
廣平公子元謙為韓國公以紹魏後丁巳柱國
吳公尉綱薨六月築元州及涇州東城秋七月
突厥遣使獻馬柱國昌寧公長孫儉薨

五年春三月甲辰初令宿衛官住關外者將家
累入京不樂者解宿衛夏四月甲寅以柱國宇文
文盛為大宗伯省帥都督官景寅遣大使巡察
天下六月景子以皇女生故降宥罪人并免適

租懸調冬十月辛巳朔日有蝕之丁酉太傅鄭
公達奚武薨十一月丁卯柱國幽公廣薨十二
月癸巳大將軍鄭恪帥師平越舊置西寧州是
月齊將斛律光侵邊於汾北築城自華谷至龍
門

六年春正月己酉朔以路門未成故廢朝丁卯
以大將軍王傑譚公會鴈門公田弘魏公李暉
等並為柱國三月己酉齊公憲自龍門度河斛
律光退保華谷憲攻拔其新築五城夏四月戊

寅朔日有蝕之。辛卯信州蠻反，遣大將軍趙閏帥師討平之。庚子，以大將軍司馬消難侯莫陳瓊、大安公閻慶神武公竇毅、南陽公叱羅協、平高公侯伏侯龍恩並為柱國。五月癸亥，遣納言鄭詡使於陳。景寅，以大將軍李諱、中山公訓杞、公亮、上庸公陸騰、安義公宇文丘、北平公寇紹、許公宇文善、犍為公高琳、鄭公達奚震、隴東公楊纂、常山公于翼並為柱國。六月乙未，以大將軍太原公王秉為柱國。是月，齊將段孝先攻陷

汾州。秋七月乙丑，以大將軍越公盛為柱國。八月癸酉，省掖庭四夷樂，後宮羅綺工五百餘人。冬十月壬午，翼公通薨。乙未，遣右武伯谷琨使於齊。壬寅，上親帥六軍講武於城南。十一月壬子，以大將軍梁公侯莫陳芮、大將軍李意並為柱國。景辰，齊人來聘。丁巳，行幸散關。十二月己丑，還宮。是冬，牛疫死者十六七。

建德元年春正月戊午，帝幸玄都觀，親御法座講說公卿道俗論難事，畢還宮。降死罪及流罪

一等其五歲刑已下並宥之二月癸酉遣大將軍昌城公深使於突厥司宗李際使於齊乙酉柱國安義公宇文丘薨三月癸卯朔日有蝕之齊人來聘景辰誅大冢宰晉公護及其子柱國譚公會并柱國侯伏侯龍恩及其弟大將軍萬壽大將軍劉勇等大赦改元罷中外府癸亥以太傅尉迥為太師柱國竇熾為太傅大司空李穆為太保齊公憲為大冢宰衛公直為大司徒趙公招為大司空柱國辛威為大司空綏德公

陸通為大司馬詔曰人勞不止則星動於天作事不時則石言於國頃興造無度徵發不已加以頻歲師旅農畝廢業去秋災蝗年穀不登自今正調以外無妄徵發夏四月甲戌以代公達滕公道並為柱國己卯詔公卿已下各舉所知遣工部代公達使於齊景戌詔百官軍人上封事極言得失丁亥詔斷四方非常貢獻庚寅追尊略陽公為孝閔皇帝癸巳立魯公贇為皇太子大赦百官各加封級五月壬戌以大旱集百

官於庭詔之曰亢陽不雨豈朕德薄刑賞乖中
歟將公卿大臣或非其人歟宜盡直言無有所
隱公卿各引咎自責其夜澍雨六月庚子改置
宿衛官員秋七月辛丑陳人來聘九月庚子朔
日有蝕之庚申扶風掘地得玉盃以獻冬十月
庚午詔江陵所獲俘虜充官口者悉免為百姓
辛未遣小匠師楊勰使於陳大司馬綏德公陸
通薨十一月景午上親御六軍講武于城南庚
戌行幸堯橋集京城東諸都督以上頒賜各有

差乙卯還宮壬戌以大司空趙公招為大司馬
十二月壬申行幸斜谷集京城以西諸軍都督
以上頒賜有差景戌還宮己丑帝御正武殿親
錄囚徒至夜而罷庚寅幸道會苑以上善殿壯
麗遂焚之

二年春正月辛丑祀南郊乙巳以柱國田弘為
大司空大將軍若鳳為柱國庚戌復置帥都
督官乙卯享太廟閏月己巳陳人來聘二月甲
寅詔皇太子贊巡撫西土壬戌遣司會侯莫陳

北史卷之十一
十三
凱使於齊省雍州內八部併入京兆馮翊扶風
咸陽等郡三月己卯皇太子於岐州獲白鹿二
以獻詔答曰在德不在瑞癸巳省六府諸司中
大夫以下官府置四司以下大夫為官之長上
士貳之夏四月己亥享太廟景辰增改東宮官
員五月丁丑以柱國侯莫陳瓊為大宗伯滎陽
公司馬消難為大司寇上庸公陸騰為大司空
六月庚子省六府員外諸官皆為丞壬子皇孫
衍生文武官普加一級大階大選諸軍將帥景

辰帝御路寢集諸軍將勛以戎事庚申詔諸軍
旗旌皆畫以猛獸鷙鳥之象秋七月己巳享太
廟自春末不雨至於是月壬申集百寮於大德
殿帝責躬罪已問以時政得失戊子雨八月景
午改三夫人為三妃關中大蝗九月乙丑陳人
來聘戊寅詔曰頃者婚嫁競為奢靡有司宜加
宣勒使遵禮制冬十月癸卯齊人來聘甲辰奏
六代樂成帝御崇信殿集百官觀之十一月辛
巳帝親帥六軍講武於城東癸未集諸軍都督

以上五十人於道會苑大射帝親臨射堂大備
軍容十二月癸巳集羣官及沙門道士等帝升
高座辨釋三教先後以儒教為先道教次之佛
教為後以大將軍赫連達為柱國詔軍人之間
年多耆壽可頒授老職使榮沾邑里戊午聽訟
於正武殿自旦及夜繼之以燭

三年春正月壬戌朝羣臣於路門冊柱國齊公
憲衛公直趙公招譙公儉陳公純越公盛代公
達滕公通並進爵為王己巳享太廟庚午突厥

遣使獻馬癸酉詔自今男年十五女年十三以
上爰及鰥寡所在以時嫁娶務從節儉乙亥親
耕籍田景字初服短衣享二十四軍督將以下
試以軍旅之法縱酒盡歡詔以往歲年穀不登
令公私道俗凡有貯積粟麥者皆準口聽留已
外盡糶二月壬辰朔日有蝕之丁酉紀公康畢
公賢鄴公貞宋公實漢公贊秦公贄曹公允並
進爵為王景午令六府各舉賢良清正之士癸
丑柱國許公宇文善有罪免景辰大赦三月癸

西皇太后叱奴氏崩帝居倚廬朝夕共一溢米
羣臣表請累旬乃止詔皇太子贊總庶政夏四
月乙卯齊人來弔贈會葬丁巳有星孛於東井
五月庚申葬文宣后於永固陵帝袒跣至陵所
辛酉詔曰齊斬之情經籍彝訓近代沿革遂亡
斯禮伏奉遺令既葬便除攀慕几筵情實未忍
三年之喪達於天子古今無易之道王者之所
常行但時有未諧不得全制軍國務重庶有聽
朝衰麻之節苦廬之禮率遵前典以申罔極百

寮以下宜遵遺令公卿上表固請俯就權制過
葬即吉帝不許引古答之羣臣乃止於是遂申
三年之制五服之內亦令依禮初置太子諫議
員四人文學十人皇子皇弟友員各二人學士
六人戊辰詔改晉公護及諸子並追復先封改
葬加謚景子初斷佛道二教經像悉毀罷沙門
道士並令還俗并禁諸淫祀非祀典所載者盡
除之六月丁未集諸軍將教以戰陣之法壬子
更鑄五行大布錢以一當十與布泉錢並行戊

午詔曰至道弘深混成無際體包空有理極幽
玄但岐路既分源流逾遠淳離朴散形器斯乖
遂使三墨八儒朱紫交競九流七略異說相騰
道隱小成其來舊矣不有會歸爭驅靡息今可
立通道觀聖哲微言先賢典訓金科玉篆祕蹟
玄文可以濟養黎元扶成教義者並宜弘闡一
以貫之俾夫翫培塿者識嵩岱之崇嶮守磧礫
者悟渤海之泓澄不亦可乎秋七月庚申行幸
雲陽宮乙酉衛王直在京又欲突入肅章門司

武尉遲運等拒守直敗遁走戊子車駕至自雲
陽宮八月辛卯禽直於荊州免為庶人冬十月
景申詔御正楊尚希使於陳庚子詔蒲州人遭
飢乏絕者令向郿城以西及荊州管內就食甲
寅行幸蒲州乙卯曲赦蒲州見囚大辟以下景
辰行幸同州十一月戊午于闐遣使獻名馬已
巳大閱於同州城東甲戌車駕至自同州十二
月戊午大會衛官及軍人以上賜錢帛各有差
景申改諸軍軍人並名侍官癸卯集諸軍講武

萬曆二十年刊
七
音字
刘心

於臨臯澤涼州比年地震壞城郭地裂涌泉出
四年春正月戊辰初置營軍器監壬申布寬大
之詔多所蠲免二月景戌朔日有蝕之辛卯改
置宿衛官員己酉柱國廣德公李意有罪免三
月景辰遣小司寇元衛使於齊郡縣各省主簿
一人甲戌以柱國趙王招為雍州牧夏四月甲
午柱國燕公干寶有罪免丁酉初令上書者並
為表於皇太子以下稱啓秋七月己未禁五行
大布錢不得出入關布泉錢聽入而不聽出甲

戊陳人來聘景子召大將軍以上於大德殿帝
親諭以伐齊之旨言往以政出權宰無所措懷
自親覽萬機便圖東討惡衣菲食繕甲練兵數
年以來戰備稍足而為主昏虐恣行無道伐暴
除亂斯實其時羣臣咸稱善丁丑下詔暴齊氏
過惡以柱國陳王純為前一軍總管榮陽公司
馬消難為前二軍總管鄭公達奚震為前三軍
總管越王盛為後一軍總管周昌公侯莫陳瓊
為後二軍總管趙王招為後三軍總管齊王憲

師衆二萬趣黎陽隋公楊堅廣寧公侯莫陳迥
舟師三萬自渭入河柱國梁公侯莫陳芮帥衆
一萬守太行道申國公李穆帥衆三萬守河陽
道常山公于翼帥衆二萬出陳汝壬午上親帥
六軍衆六萬直指河陰八月癸卯入齊境禁伐
樹殘苗稼犯者以軍法從事丁未上親帥諸軍
攻拔河陰大城攻子城未剋上有疾九月辛酉
夜班師水軍焚舟而退齊主憲于翼李穆等所
在剋捷降拔三十餘城皆棄而不守唯以王藥

城要害令儀同三司韓正守之正尋以城降齊
戊寅至自東伐冬十月戊子初置上柱國上大
將軍官改開府儀同三司為開府儀同大將軍
又置上開府上儀同官閏月以柱國齊王憲蜀
公尉遲迥為上柱國詔諸畿郡各舉賢良十一
月己亥改置司內官員十二月辛亥朔日有蝕
之景子陳人來聘是歲歧寧二州人飢開倉振
恤

五年春正月辛卯行幸河東涑川集關河東諸

軍校獵甲午還同州丁酉詔分遣大使周省四方察訟聽謠問人卹隱廢布泉錢戊申初令鑄錢者至絞從者遠配二月辛酉遣皇太子賈巡撫西土仍討吐谷渾三月壬寅車駕至自同州文宣皇太后服再暮戊申祥夏六月戊申朔日有蝕之辛亥享太廟景辰利州總管紀王康有罪賜死秋七月乙未京師旱八月戊申皇太子入吐谷渾至伏侯城而還乙丑陳人來聘九月丁丑大醮于正武殿以祈東伐冬十月帝復諭

羣臣伐齊以去歲屬有疹疾遂不得剋平逋寇于時出軍河外直為撫背未扼其喉然晉州本高歡所起統攝要重今往攻之彼必來援嚴軍以待擊之必剋然後乘破竹之勢鼓行而東足以窮其窟穴諸將多不願行帝曰機者事之微不可失矣沮軍事者以軍法裁之己酉帝總戎東伐以越王盛為右一軍總管杞公亮為右二軍總管隋公楊堅為右三軍總管譙王儉為左一軍總管大將軍竇泰為左二軍總管廣化公

丘崇為左三軍總管齊王憲陳王純為前軍癸亥帝至晉州遣齊王憲帥精騎二萬守雀鼠谷陳王純步騎二萬守千里徑鄭公達奚震步騎一萬守統軍川大將軍韓明步兵五千守齊子嶺烏氏公尹升步騎五千守鼓鍾鎮涼城公辛韶步騎五千守蒲津關柱國趙王招步騎一萬自華谷攻汾州諸城柱國宇文盛步兵一萬守汾水關遣內史王誼監六軍攻晉州城帝屯於汾曲齊王憲攻洪洞永安二城並拔之是夜虹

見於晉州城上首向南尾入紫宮帝每日自汾曲赴城下親督戰庚午齊行臺左丞侯子欽出降壬申齊晉州刺史崔嵩夜密使送款上開府王軌應之未明登城遂剋晉州甲戌以上開府梁士彥為晉州刺史以鎮之十一月己卯齊主自并州帥眾來援帝以其兵新集且避之乃詔諸軍班師齊主遂圍晉州齊王憲屯諸軍於涑水為晉州聲援河東地震癸巳至自東伐獻俘於太廟景申放齊諸城鎮降人還丁酉帝發京

師壬寅度河與諸軍合十二月戊申次晉州庚戌帝帥諸軍八萬置陣東西二十餘里乘常御馬從數人巡陣所至輒呼主帥姓名以慰勉之將士感見知之恩各思自厲將戰有司請換馬帝曰朕獨乘良馬何所之齊主亦於壑北列陣申後齊人填壑南引帝大喜勒諸軍擊之齊人便退齊主與其麾下數十騎走還并州齊衆大潰軍資甲仗數百里間委棄山積辛亥帝幸晉州仍率諸軍追齊主諸將固請還師帝曰縱敵

患生卿等若疑朕將獨往諸將不敢言甲寅齊主遣其丞相高阿那肱守高壁帝麾軍直進那肱望風退散景辰師次介休齊將韓建業舉城降以為上柱國封郇國公丁巳大軍次并州齊主留其從兄安德王延宗守并州自將輕騎走鄴是日詔齊王公以下示以順逆之道於是齊將帥降者相繼戊午高延宗僭即偽位改年曰德昌己卯軍次并州帝帥諸軍合戰齊人退帝逐北及城東門諸軍遶城置陣至夜延宗帥其

衆排陣而前城中軍却人相蹂踐大為延宗所
敗齊人欲閉門以閹下積尸扉不得闔帝從數
騎崎嶇危險僅得出門至明帥諸軍更戰大破
之禽延宗并州平壬戌詔曰昔天厭水運龍戰
于野兩京否隔四紀于茲朕垂拱巖廊君臨宇
縣相邠人於海內混楚弓於天下一物失所有
若推溝方欲德綏未服義征不諛偽主高緯放
命燕齊怠慢典刑俶擾天紀加以背惠怒隣棄
信忘義朕應天從物伐罪弔人一鼓而蕩平陽

再舉而摧強敵偽署王公相繼道左高緯智窮
數屈逃竄草間偽安德王高延宗擾攘之間遂
竊名號與偽齊昌王莫多婁敬顯等收合餘燼
背城借一王威旣振魚潰鳥離被竹更難建瓴
非易延宗衆散解甲軍門根本旣傾枝葉自實
幽青海岱折簡而來冀北河南傳檄可定八紘
共貫六合同風方當偃伯靈臺休牛桃塞無疆
之慶非獨在予漢皇約法除其苛政姬王輕典
刑彼新邦思覃惠澤被之率土新集臣庶皆從

蕩滌可大赦天下高緯及王公以下若釋然歸
順咸許自新諸亡入偽朝亦從寬宥官禁次序
依例無失齊制偽令即宜削除鄒魯摺紳幽并
騎士一介可稱並宜銓錄景寅出齊宮中金銀
寶器珠玉麗服及宮女二千人班賜將士以柱
國趙王招陳王純越王盛杞公亮梁公侯莫陳
芮庸公王謙北平公寇紹鄭公達奚震並為上
柱國封齊王憲子安城郡公賈為河間王諸有
功者封授各有差癸酉帝帥六軍趣鄴

六年春正月乙亥齊主傳位於其太子恒改年
曰承光自號太上皇壬辰帝至鄴癸巳帥諸軍
圍之齊人拒守諸軍奮擊大破之遂平齊主先
送其母及妻子於青州及城陷帥數十騎走青
州遣大將軍尉勤追之是戰也於陣獲其齊昌
王莫多婁敬顯帝數之曰汝有死罪三前從并
州走鄴棄母攜妻妾是不孝外為偽主戮力內
實通啓於朕是不忠送款之後猶持兩端是不
信如此用懷不死何待遂斬之是日西方有聲

如雷甲子帝入鄴城詔去年大赦班宣未及之處皆從赦例己亥詔曰晉州大陣至鄴身殞戰場者其子即授父本官尉勤禽齊主及其太子恒於青州庚子詔曰偽齊之末姦佞擅權濫罰淫刑動挂羅網偽右丞相咸陽王故斛律明月偽侍中特進開府故崔季舒等七人或功高獲罪或直言見誅朕兵以義動翦除凶暴表閭封墓事切下車宜追贈謚并加窆厝其見在子孫各隨蔭敘錄家口田宅沒官者並還之辛丑詔

偽齊東山南園及三臺並毀撤瓦木諸物凡入用者盡賜百姓山園之田各還本主二月景午論定諸軍勳置酒於齊太極殿會軍士以上班賜有差丁未齊主至帝降自阼階見以賓主禮齊任城王湝在冀州擁兵未下遣上柱國齊王憲與柱國隋公楊堅討平之齊范陽王高紹義叛入突厥齊諸行臺州鎮悉降關東平合州五十五郡一百六十二縣三百八十五戶三十萬二千五百二十八口二十萬六千八百八十六

乃於河陽及幽青南兗豫徐北朔定州置總管
府相并二總管各置官及六府官癸丑詔自偽
武平三年以來河南諸州人偽齊破掠為奴婢
者不問公私並放免之其往在淮南者亦即聽
還願住淮北者可隨便安置癘疾孤老不能自
存者所在矜恤乙卯車駕發自鄴三月壬午詔
山東諸州各舉士夏四月乙巳至自東伐列齊
主於前其王公等並從車輿旌旗及器物以次
陳於其後大駕布六軍備凱樂獻俘於太廟京

邑觀者皆稱萬歲戊申封齊主為溫國公庚戌
大會羣臣及諸蕃客於路寢乙卯廢蒲陝涇寧
四州總管己巳享太廟詔分遣使人巡方撫慰
觀風省俗五月丁丑以柱國譙王儉為大冢宰
庚辰以上柱國杞公亮為大司徒鄭公達奚震
為大宗伯梁公侯莫陳芮為大司馬柱國應公
獨孤承業為大司寇鄭公韋孝寬為大司空辛
巳大醮於正武殿以報功己丑祀方丘詔曰往
者冢臣專任制度有違正殿別寢事窮壯麗非

直彫墻峻宇深戒前王而締構弘敞有踰清廟
不軌不物何以示後兼東夏初平人未見德率
先海內宜自朕始其路寢會義崇信含仁雲和
思齊諸殿等農隙之時悉可毀撤彫斲之物並
賜貧人繕造之宜務從卑朴戊戌詔曰京師宮
殿已從撤毀并鄴二所華侈過度誠復作之非
我豈容因而弗革諸堂殿壯麗並宜除蕩薨宇
雜物分賜窮人三農之隙別漸營構止蔽風雨
務在卑狹庚子陳人來聘是月青城門無故自

崩六月辛亥御正武殿錄囚徒甲子東巡丁卯
詔曰自今不得娶母同姓以為妻妾秋七月景
戎行幸洛州己丑詔山東諸州舉有才望者赴
行在所共論政事得失八月壬寅議權衡度量
頒於天下其不依新式者悉追停之詔曰以刑
止刑以輕代重罪不及嗣皆有定科雜役之徒
獨異常憲一從罪配百代不免罰既無窮刑何
以措凡諸雜戶悉放為百姓配雜之科因之永
削甲子鄭州獻九尾狐皮肉銷盡骨體猶具帝

曰瑞應之來必昭有德若使五品時序四海和平家識孝慈乃能致此今無其時恐非實錄乃令焚之九月壬申以柱國鄧公竇熾申公李穆為上柱國戊寅初令庶人以上非朝祭之服唯得衣綢綿綢絲布圓綾紗絹綃葛布等九種壬辰詔東土諸州儒生明一經以上並舉送州郡以禮發遣冬十月戊申行幸鄴宮戊午改葬德皇帝於冀州帝服總哭於太極殿百官素服哭是月誅溫公高緯十一月壬申封皇子克為道

王克為蔡王癸酉陳將吳明徹侵呂梁徐州總管梁士彥與戰不利退守徐州遣上大將軍郟公王軌討之是月稽胡反遣齊王憲討平之詔自永熙二年七月以來十月以前東土人被鈔在化內為奴婢者及平江陵日良人沒為奴婢者並免同人伍詔曰正位於中有聖通典質文相革損益不同五帝則四星之象三王制六宮之數劉曹已降等列彌繁選擇徧於生靈命秩方於庶職椒房丹地有衆如雲本由嗜欲之情

非關風化之義朕運當澆季思復古始弘贊後
庭事從簡約可置妃二人世婦三人御妻三人
自茲以外宜悉減省己亥晦日有蝕之初行刑
書要制持杖羣強盜一疋以上不持杖羣強盜
五疋以上監臨主掌自盜二十疋以上小盜及
詐請官物三十疋以上正長隱五戶及十丁以
上隱地三頃以上皆至死刑書所不載者自依
律科十二月北營州刺史高寶寧據州反庚申
行幸并州宮移并州軍人四萬戶於關中戊辰

廢并州宮及六府是歲吐谷渾百濟並遣使朝
貢

宣正元年春正月癸酉吐谷渾偽趙王他婁屯
來降壬午行幸鄴宮辛卯幸懷州癸巳幸洛州
詔於懷州置宮二月甲辰柱國大冢宰譙王儉
薨丁巳車駕至自東巡乙丑以上柱國越王盛
為大冢宰陳王純為雍州牧三月戊辰於蒲州
置宮廢同州及長春二宮壬申突厥遣使朝貢
甲戌初服常冠以皂紗為之加簪而不施纓導

其制若今之折角巾也。上大將軍王軌破陳師於呂梁，禽其將吳明徹等，俘斬三萬餘人。丁亥，詔柱國豆盧寧征江南武陵南平等郡所有士庶為人奴婢者，悉依江陵放免。壬辰，改元夏。四月壬子，初令遭父母喪者聽終制。庚申，突厥入寇幽州。五月己丑，帝總戎北伐，遣柱國原公、姬願、東平公、宇文神舉等五道俱入，發關中公私馬驢悉從軍。癸巳，帝不豫，止于雲陽宮。景申，詔停諸軍。六月丁酉，帝疾甚，還京，其夜崩于乘輿。

時年三十六。遺詔曰：人肖形天地，稟質五常，修短之期，莫非命也。朕君臨宇縣，十有九年，未能使百姓安樂，刑措不用，未旦求衣，分宵忘寢，昔魏室將季，海內分崩，大祖扶危，翼傾肇開王業，燕趙榛蕪，又竊名號，朕上述先志，下順人心，遂與王公將帥共平東夏，雖復祆氛蕩定，而人勞未康，每一念如此，若臨冰谷，將欲包舉六合，混同文軌，今邁疾大漸，力氣稍微，有志不申，以此歎息，天下事重，萬機不易，王公以下，爰及庶寮。

宜輔導太子副朕遺意令上不負太祖下無失
為臣朕雖瞑目九泉無所復恨朕平生居處每
存菲薄非直以訓子孫亦乃本心所好喪事資
用須使儉而合禮墓而不墳自古通典隨吉即
葬葬訖公除四方士庶各三日哭妃嬪以下無
子者悉放還家謚曰武皇帝廟稱高祖己未葬
於孝陵帝沉毅有智謀初以晉公護專權常自
晦迹人莫測其深淺及誅護之後始親萬機剋
已勵精聽覽不怠用法嚴整多所罪殺號令懇

惻唯屬意於政羣下畏服莫不肅然性既明察
少於恩惠凡布懷立行皆欲踰越古人身衣布
袍寢布被無金寶之飾諸宮殿華綺者皆撤毀
之改為土階數尺不施櫺栱其彫文刻鏤錦繡
纂組一皆禁斷後宮嬪御不過十餘人勞謙接
下自強不息以海內未康銳情教習至於校兵
閱武步行山谷履涉勤苦皆人所不堪平齊之
役見軍士有跣行者帝親脫靴以賜之每宴會
將士必自執盃勸酒或手付賜物至於征伐之

處躬在行陣性又果決能斷大事故能得士卒
死力以弱制強破齊之後遂欲窮兵極武平突
厥定江南一二年間必使天下一統此其志也
宣皇帝諱贇字乾伯武帝長子也母曰李太后
武成元年生於同州保定元年五月景午封魯
國公建德元年四月癸巳武帝親告廟冠於阼
階立為皇太子二年詔皇太子巡撫西土文宣
后崩武帝諒闇詔太子總朝政五旬而罷武帝
每巡幸四方太子常留監國五年二月又詔太

子巡西土因討吐谷渾宣政元年六月丁酉武
帝崩戊戌太子即皇帝位尊皇后曰皇太后甲
子誅上柱國齊王憲閏月乙亥詔山東流人新
復業及突厥侵掠家口破亡不能存濟者給復
一年立妃楊氏為皇后辛巳以上柱國趙王招
為太師陳王純為太傅柱國代王達滕王道盧
公尉遲運薛公長孫覽並為上柱國是月幽州
盧昌期據范陽反詔柱國東平公宇文神舉討
平之秋七月乙巳享太廟景午祀圓丘戊申祀

方澤庚戌以小宗伯岐公斛斯徵為大宗伯壬戌以南兗州總管隋公楊堅為上柱國大司馬癸亥尊所生李氏為帝太后八月景寅夕月於西郊長安萬年二縣人居京城者給復三年壬申幸同州遣大使巡察諸州制九條宣下州郡其母族絕服外者聽婚以上柱國薛公長孫覽為大司徒柱國楊公王諡為大司空景戌以柱國永昌公椿為大司寇九月丁酉以柱國宇文盛張掖公王傑枹罕公辛威鄖國公韋孝寬並為上柱國庚戌封皇弟元為荆王詔諸應拜者皆以三拜成禮冬十月癸酉至自同州戊子百濟遣使朝貢十一月己亥講武於道會死帝親擐甲是月突厥犯邊圍酒泉殺掠吏士十二月甲子以柱國畢王賢為大司空己丑以上柱國河陽總管滕王道為行軍元師伐陳免京師見徒並令從軍

大象元年春正月己丑受朝於路門帝服通天冠絳紗袍羣臣皆服漢魏衣冠大赦改元為大

成初置四輔官以大家宰越王盛為大前疑蜀公尉遲迥為大右弼申公李穆為大左輔大司馬隋公楊堅為大後丞癸卯封皇子衍為魯王甲辰東巡景午以柱國常山公子翼為大司徒辛亥以柱國許公宇文善為大宗伯戊午行幸洛陽立魯王衍為皇太子二月癸亥詔曰河洛之地舊稱朝市自魏氏失馭城闕為墟我太祖受命豐鎬有懷光宅高祖往巡東夏布政此宮朕以眇身祇承寶運雖庶幾聿脩之志敢忘燕翼之心一昨駐蹕金墉備嘗遊覽百王制度基址尚存今若因循為功易立宜命邦事脩復舊都奢儉取文質之間功役依子來之義北瞻河內咫尺非遙前詔經營今宜停罷於是發山東諸州兵增一月功為四十五日役起洛陽宮常役四萬人以迄晏駕并移相州六府於洛陽稱東京六府殺柱國徐州總管鄭公王軌停南討諸軍以趙王招女為千金公主嫁於突厥乙亥行幸鄴景子初令總管刺史行兵者加持節餘

萬曆二十年刊
七史本已卷十
三五
五三三三

悉罷之。辛巳詔傳位於皇太子，衍大赦，改元大成。為大象帝。於是自稱天元皇帝，所居稱天臺，冕二十有四旒，車服旗鼓皆以二十四為節。內史御正皆置上大夫，皇帝衍稱正陽宮，置納言、御正、諸衛等官，皆准天臺尊皇太后為天元皇太后。癸未日出將入時，其中並有烏色大如雞卵，經四日乃滅。戊子以大前疑越王盛為太傅，大右弼蜀公尉迥為大前疑，代王達為大右弼。辛卯詔徙鄴城石經於洛陽，又詔洛陽凡是元

遷戶並聽還洛州。此外欲往者聽之。河陽幽相豫亳青徐七總管受東京六府處分。三月庚申車駕至自東巡，大陳軍伍，親擐甲胄，入自青門。皇帝衍備法駕從，百官迎於青門外。是時驟雨，儀衛失容。辛酉封趙王招第二子貫為永康縣王。夏四月壬戌朔，有司奏言日蝕，不視事。過時不蝕，乃臨軒立妃朱氏為天元帝后。癸亥以柱國畢王賢為上柱國。己巳享太廟。壬午大醮於正武殿。五月辛亥以洛州襄國郡為趙國，齊州

濟南郡為陳國豐州武當安富二郡為越國潞
州上黨郡為代國荊州新野郡為滕國邑各一
萬戶令趙王招陳王純越王盛代王達滕王道
並之國是月遣使簡視京城及諸州士庶女充
選後宮突厥寇并州六月咸陽有池水變為血
徵山東諸州人修長城秋七月庚寅以大司空
畢王賢為雍州牧大後丞隋公楊堅為大前疑
柱國榮陽公司馬涓難為大後丞景申納大後
丞司馬涓難女為正陽宮皇后己酉尊帝太后

李氏為天皇太后壬子改天元帝后朱氏為天
皇后立妃元氏為天右皇后妃陳氏為天左皇
后八月庚申幸同州壬申還宮甲戌以天左皇
后父大將軍陳山提天右皇后父開府元晟並
為上柱國初武帝作刑書要制用法嚴重及帝
即位恐物情未附除之至是為刑經聖制其法
深刻大醮於正武殿告天而行焉壬午以上柱
國雍州牧畢王賢為太師上柱國郇公韓建業
為大左輔是月所在螻羣鬪各四五尺死者十

八九九月己卯以豐王貞為大冢宰上柱國
 公韋孝寬為行軍元帥率行軍總管杞公亮
 公梁士彥伐陳遣御正杜果使於陳冬十月壬
 戌幸道會苑大醮以高祖武皇帝配醮初復佛
 象及天尊象帝與二象俱南坐大陳雜戲令京
 城士庶縱觀是月相州人段德舉謀反伏誅十
 一月乙未夜行幸同州壬寅還宮乙巳初鑄永
 通萬國錢以一當千與五行大布並行是月韋
 孝寬拔壽陽杞國公亮拔黃城梁士彥拔廣陵

陳人退走於是江北盡平十二月戊午以災異
 屢見帝御路寢見百官詔曰朕以寡德君臨區
 寓始於秋季及此玄冬幽憂殷勤屢貽深戒至
 於金入南斗木犯軒轅熒惑干房又與土合流
 星照夜東南而下然則南斗主於爵祿軒轅為
 於後宮房曰明堂布政所也火土則憂孽之兆
 流星乃兵凶之驗豈其宮人失序女謁尚行政
 事乖方憂患將至何其昭著若斯之甚將避正
 寢齋居克念惡衣減膳去飾徹懸披不諱之誠

開直言之路欲使刑不濫及賞弗踰等選舉以才宮闈修德宜宣諸內外庶盡弼諧允叶人心用消天譴於是舍仗衛往天興宮百官上表勸復寢膳許之甲子還宮御正武殿集百官及宮人內外命婦大列妓樂又縱胡人乞寒用水澆沃以為戲樂乙丑行幸洛陽帝親御驛馬日行三百里四皇后及文武侍衛數百人並乘駟以從令四后方駕齊驅或有先後便加譴責人馬頓仆相屬於道己卯還宮

二年春正月丁亥帝受朝于道會苑癸巳享太廟乙巳造二辰畫日月象以置左右戊申雨雪止又雨細黃土移時乃息乙卯詔江右諸州新附人給復二十年初稅入市者人一錢二月丁巳帝幸路門學行釋奠禮戊午突厥遣使獻方物且逆千金公主乙丑改制詔為天制敕為天敕尊天元皇太后為天元上皇太后天皇太后李氏曰天元聖皇太后癸未立天元皇后楊氏為天元大皇后天皇后朱氏為天大皇后天

右皇后元氏為天右大皇后天左皇后陳氏為
天左大皇后正陽宮皇后直稱皇后是月洛陽
有禿鷲鳥集新太極殿前棗州有黑龍見與赤
龍鬪於汴水側黑龍死三月丁亥賜百官及百
姓大酺詔進封孔子為鄒國公邑數準舊并立
後承襲別於京師置廟以時祭奠戊子行軍總
管杞公亮舉兵反行軍元帥韋孝寬獲而殺之
辛卯行幸同州增候正前驅式道為三百六十
重自應門至赤岸澤數十里間幡旗相蔽鼓樂

俱作又令武賁持鉞馬上稱警蹕以至同州乙
未改同州宮為天成宮庚子車駕至自同州詔
天臺侍衛皆着五色及紅紫綠衣以雜色緣名
曰品色衣有大事與公服間服之壬寅詔內外
命婦皆執笏其拜宗廟及天臺皆俯伏甲辰初
置天中大皇后立天左大皇后陳氏為天中大
皇后立妃尉遲氏為天左大皇后夏四月己巳
享太廟己卯以旱故降見囚死罪已下壬午幸
中山祈雨至咸陽宮雨降甲申還宮令京城士

女於衢巷作音樂以迎候五月甲午帝備法駕
幸天興宮乙未帝不念還宮詔揚州總管隋公
楊堅入侍疾丁未追趙越陳代滕五王入朝已
酉大漸御正下大夫劉昉與內史上大夫鄭譯
矯制以隋公楊堅受遺輔政是日帝崩於天德
殿時年二十二謚宣皇帝七月景申葬定陵帝
之在東宮也武帝慮其不堪承嗣遇之甚嚴朝
見進止與諸臣無異雖隆寒盛暑亦不得休息
性嗜酒武帝遂禁醪醴不許至東宮帝每有過

輒加捶扑嘗謂之曰古來太子被廢者幾人餘
人豈不堪立邪於是遣東宮官屬錄帝言語動
作每月奏聞帝懼威嚴矯情脩飾以是惡不外
聞嗣位之初方逞其欲大行在殯曾無戚容即
通亂先帝宮人纔踰年便恣聲樂采擇天下子
女以充後宮好自矜夸飾非拒諫禪位之後彌
復僞奢耽酗於後宮或旬日不出公卿近臣請
事者皆附闥官奏之所居宮殿帷帳皆飾以金
玉珠寶光華炫耀極麗窮奢及營洛陽宮雖未

成畢其規摹壯麗踟於漢魏遠矣唯自尊崇無
所顧憚國典朝儀率情變改後宮位號莫能詳
錄舞對臣下自稱為天以五色土塗所御天德
殿各隨方色又於後宮與皇后等列坐用宗廟
禮器樽彝珪瓚之屬以次食焉又令羣臣朝天
臺者致齋三日清身一日車旗章服倍於前王
之數既自比上帝不欲令人同已常自帶綬及
冠通天冠加金附蟬顧見侍臣武弁上有金蟬
及王公有綬者並令去之又不聽人有高者大

者之稱諸姓高者改為姜九族稱高祖者為長
祖曾為次長祖官稱名位凡謂上及大者改為
長有天者亦改之又令天下車皆渾成為輪禁
天下婦人皆不得施粉黛唯宮人得乘有輻車
加粉黛焉西陽公溫相公亮之子即帝從祖兄
其妻尉遲氏有容色因入朝帝遂飲以酒逼而
姪之亮聞之懼謀反纔誅溫即遣尉遲氏入宮
初為妃尋立為皇后每左右侍臣論議唯欲興
造革易未嘗言及政事其後遊戲無恒出入不

節羽儀仗衛晨出夜還或幸天興宮或遊道會苑陪侍之官皆不堪命散樂雜戲魚龍爛漫之伎常在目前好令京城少年為婦人服飾入殿歌舞與後宮觀之以為喜樂擯斥近臣多所猜怨又吝於財略無賜與恐羣臣規諫不得行已之志常遣左右密伺察之動止所為莫不抄錄小有乖違輒加其罪自公卿以下皆被楚撻其間誅戮黜免者不可勝言每捶人皆以百二十為度名曰夫杖宮人內職亦如之后妃嬪御雖

被寵嬖亦多被杖背於是內外恐懼人不自安皆求苟免莫有固志重足累息以逮於終矣靜皇帝諱衍後改名闡宣帝之長子也母曰朱皇后建德二年六月生於東宮大象元年正月癸卯封魯王戊午立為皇太子二月辛巳宣帝於鄴宮傳位授帝居正陽宮

二年五月乙未宣帝寢疾詔帝入宿路門學己酉宣帝崩帝入居天臺廢正陽宮大赦停洛陽宮作庚戌上天元上皇太后尊號為太皇太后

天元聖皇太后李氏為大帝太后天元太皇后
 為皇太后天太皇后朱氏為帝太后其天中大
 皇后陳氏天右大皇后元氏天左大皇后尉遲
 氏並出俗為尼以柱國漢王贊為上柱國右大
 丞相上柱國揚州總管隋宮楊堅為假黃鉞左
 大丞相柱國秦王贊為上柱國帝居諒闇百官
 總已以聽於左大丞相壬子以上柱國鄭公韋
 孝寬為相州總管罷入市稅錢六月戊午以柱
 國許公宇文善神武公竇毅脩武公侯莫陳瓊

大安公閻慶並為上柱國趙主招陳王純越王
 盛代王達滕王迤來朝庚申復佛道二教辛酉
 以柱國杞公贊燕公于寔郃公賀拔伏恩並為
 上柱國甲子相州總管尉遲迥舉兵不受代詔
 發關中兵即以韋孝寬為行軍元帥討之柱國
 畢王賢以謀執政被誅以上柱國秦王贊為大
 冢宰杞公椿為大司徒己巳詔南定北光衡巴
 四州人為宇文亮抑為奴婢者並免之甲戌有
 赤氣起西方漸東行徧天庚辰罷諸魚池及山

澤公禁者與百姓共之以柱國蔣公梁睿為益
州總管秋七月甲申突厥送齊范陽王高紹義
庚寅申州刺史李惠起兵庚子詔趙陳越代滕
五王入朝不趨劔履上殿榮州刺史邵公宇文
胄舉兵遣大將軍楊素討之青州總管尉遲綱
舉兵丁未隋公楊堅都督內外諸軍事己酉鄖
州總管司馬消難舉兵以柱國楊公王誼為行
軍元帥討之壬子趙王招越王盛以謀執政被
誅癸丑封皇弟衍為萊王術為郢王是月豫州

襄州總管諸蠻各帥種落反八月庚申益州總
管王謙舉兵不受代即以梁睿為行軍元帥討
之庚午韋孝寬破尉迴於鄴迴自殺相州平移
相州於安陽其鄴城及邑毀廢之景子以漢王
贇為太師以上柱國并州總管申公李穆為太
傅以宋王實為大前疑以秦王質為大右弼以
燕公于實為大左輔己卯以尉迴平大赦庚辰
司馬消難擁眾以魯山甌山二鎮奔陳遣大將
軍元景山追擊之鄖州平沙州氏帥開府楊永

安聚衆反應王謙遣大將軍達奚儒討之楊素
破宇文冑於滎陽斬之以上柱國神武公竇毅
為大司馬以齊公于智為大司空發相青荆金
晉梁州六總管九月景戌廢河陽總管為鎮隸
洛州以小宗伯竟陵公楊慧為大宗伯壬辰廢
皇后司馬氏為庶人戌戌以柱國楊公王誼為
上柱國庚戌以柱國常山公于翼化政公宇文
忻並為上柱國壬子丞相去左右號隋公楊堅
為大丞相冬十月甲寅日有蝕之壬戌陳王純

以怨執政被誅大丞相隋公楊堅加大冢宰五
府總於天宮戊寅梁睿破王謙斬之傳首京師
益州平十一月甲辰達奚儒破楊永安沙州平
丁未上柱國鄭公韋孝寬薨十二月壬子以柱
國蔣公梁睿為上柱國丁巳以柱國邗公楊雄
普安公賀蘭暮邨公梁士彥上大將軍新寧公
叱列長文武鄉公崔弘度大將軍中山公宇文
恩濮陽公宇文述涇原公和干子任城公王景
漁陽公楊銳上開府廣宗公李崇隴西公李詢

並為上柱國庚申以柱國楚公盧勣為上柱國癸亥詔曰大祖受命龍德猶潛三分天下志扶魏室多所改作冀允上玄文武羣官賜姓者衆本殊國邑實乖胙土不歆非類異骨肉而共蒸嘗不愛其親嗟行路而敘昭穆且神徵革姓本為曆數有歸天命在人推讓終而弗獲故君臨區宇累世於茲可不仍尊謙抑之旨久行權宜之制諸改姓者悉宜復舊甲子大丞相隋公楊堅進爵為王以郡為隋國己巳以柱國沛公

鄭譯為上柱國辛未代王達滕王道並以謀執政被誅壬申以大將軍長寧公楊勇為上柱國大司馬以小冢宰始平公元孝矩為大司寇大定元年春正月壬午改元景戌詔戎秩上開府以上職事下大夫以上外官刺史以上各舉賢良二月甲子帝遜位于隋居于別宮隋氏奉帝為介國公邑萬戶車服禮樂亦如周制上書不稱表答表不稱詔有其文事竟不行隋開皇元年五月壬申帝崩時年九歲隋志也謚曰靜

皇帝葬恭陵

論曰自東西否隔一國爭強戎馬生郊干戈日用兵連禍結力敵勢均壇場之事一彼一此武皇繼業未親萬機慮遠謀深以蒙養正及英威電發朝政惟新內難既除外略方始乃苦心焦思克己勵精勞役為士卒之先居處同疋夫之儉修富國之政務強兵之術乘讐人之有釁順天道而推亡數年之間大勳斯集攄祖宗之宿憤拯東夏之阽危盛矣哉有成功者也若使異

日之瘳無爽經營之志獲申黷武窮兵雖見譏於良史雄圖遠略足方駕於前王而識嗣子之非才顧宗祏之至重滯愛同於晉武則哲異於宋宣但欲威之覆楚期於懲肅義方之教豈若是乎卒使昏虐君臨姦回肆毒迹宣后之行事身歿已為幸矣靜帝越自幼冲紹茲衰統內相挾孫劉之詐戚藩無齊代之強隋氏因之遂遷龜鼎雖復岷峨投袂翻成凌奪之威漳滏勤王無救宗周之殞嗚呼以文皇之經啓鴻基武皇之

北史卷十一
四十七
克隆景業未踰二紀不祀忽諸斯蓋先帝之餘
殃非孺子之罪戾也

甲寅十月十六夜一見
林深

周本紀下第十

北史十

隋本紀上第十一

北史十一

隋高祖文皇帝姓楊氏諱堅小名那羅延本弘
農華陰人漢太尉震之十四世孫也震八世孫
燕北平太守鉉鉉子元壽魏初為武川鎮司馬
因家于神武樹頽焉元壽生太原太守惠嘏嘏
生平原太守烈烈生寧遠將軍禎禎生皇考忠
初禎屬魏末喪亂避地中山結義徒以討鮮于
修禮遂死之周保定中皇考著勳追贈柱國大
將軍少保興城郡公皇考美髯身長七尺八

萬曆二十年

北史本紀卷十一

三十四馬文

寸狀貌瓌偉武藝絕倫識量深重有將率之略
年十八客游泰山會梁兵陷郡國沒江南及北
海王元顥入洛乃與俱歸顥敗尔朱度律召為
帳下統軍後從獨孤信屢有軍功又與信從魏
孝武西遷東魏荊州刺史辛纂據穰城皇考從
信討之與都督康洛兒元長生乘城而入彎弓
大呼斬纂以徇城中懾服居半歲以東魏之逼
與信俱歸周文帝召居帳下嘗從周文狩於龍
門皇考獨當一猛獸左挾其腰右拔其舌周文

壯之北臺謂猛獸為揜于因以字之從禽竇泰
破沙苑陣封襄武縣公河橋之役皇考與壯士
五人力戰守橋敵人不敵進又與李遠破黑水
稽胡并與怡峰解王壁圍以功歷雲洛二州刺
史芒山之戰先登陷陣除大都督及侯景度江
梁氏喪敗周王將經略乃授皇考都督荆等十
五州諸軍事鎮穰城梁雍州刺史岳陽王蕭贍
雖曰稱藩而尚懷貳心皇考自樊城觀兵漢濱
易旗遞進實二千騎登樓望之以為三萬懼

而服焉又攻梁隨郡剋之獲其守桓和所過城
戍望風請服進圍安陸梁司州刺史柳仲禮恐
安陸不守馳歸赴援諸將恐仲禮至則安陸難
下請急攻之皇考曰仲禮已在近路吾以奇兵
襲之一舉必剋則安陸不攻自拔諸城可傳檄
而定於是選騎二千銜枚夜進遇仲禮於滌頭
禽之悉俘其衆安陸竟陵並降梁元帝大懼送
子方略為質并送載書請魏以石城為限梁以
安陸為界皇考乃旋師進爵陳畱郡公位大將

軍十七年梁元帝逼其兄邵陵王綸送質於齊
欲來寇梁元帝密報周文遣皇考討之禽綸數
其罪殺之初皇考禽柳仲禮遇之甚厚仲禮至
京反譖皇考言在軍大取金寶周文以皇考功
重不問然皇考悔不殺仲禮故至此殺綸皇考
間歲再舉盡定漢東地甚得新附心魏恭帝賜
姓普六茹氏行同州事及于謹伐江陵皇考為
前軍屯江津遏其走路梁人束刃於象鼻以戰
皇考射之二象反走江陵平周文立蕭譽為梁

主令皇考鎮穰城周孝閔踐阼入為小宗伯及
司馬消難請降皇考與柱國達奚武援之入齊
境五百里前後遣三使報消難皆不反命及去
北豫州三十里武疑有變欲還皇考曰有進死
無退生獨以千騎夜趣城下候門開而入乃馳
遣召武時齊鎮城伏敵遠勒甲士三千據東陴
舉烽嚴警武憚之不欲保城乃多取財寶以消
難先歸皇考以二千騎殿到洛南皆解鞍而臥
齊衆來追至於洛北皇考謂將士曰但飽食今

在死地賊必不敢度水食畢齊兵陽若度水皇
考馳將擊之齊兵不敢逼遂徐引而還武歎曰
達奚武自言是天下健兒今日服矣進位柱國
大將軍武成元年進封隋國公邑萬戶別食竟
陵縣一千戶收其租賦保定二年為大司空時
朝議與突厥伐齊公卿咸以齊兵強國富斛律
明月不易可當兵非十萬衆不可皇考獨曰萬
騎足矣明月豎子亦何能為三年乃以皇考為
元帥大將軍楊纂李穆王傑尔朱敏及開府元

北史卷之十一
四
壽田弘慕容近等皆隸焉又令達奚武帥步騎
三萬自南道進期命晉陽皇考乃留敏據什貴
游兵河上皇考出武川過故宅祭先人饗將士
席卷二十餘城齊人守陁嶺之隘皇考縱奇兵
大破之留楊纂屯靈丘為後拒突厥木杆可汗
控地頭可汗步離可汗等以十萬騎來會

四年正月朔攻晉陽時大雪風寒齊人乃悉其
精銳鼓譟而出突厥引上西山不肯戰衆失色
皇考乃率七百人步戰死者十四五以武後期

乃班師齊人亦不敢逼突厥乃縱兵大掠自晉
陽至平城七百餘里人畜無遺周武帝拜皇考
為太傅晉公護以其不附已以為涇州總管是
歲大軍又東伐晉公護出洛陽令皇考出沃野
以應接突厥時軍糧少諸將憂之皇考曰當獲
以濟事耳乃招誘稽胡首領咸令在坐使王傑
盛軍容鳴鼓而出皇考陽怪問之傑曰大冢宰
已至洛陽天子聞銀夏間胡擾動故使傑就攻
除之又令突厥使者馳告曰可汗更入并州留

兵馬十萬在長城下故令問公若有稽胡不服
 欲來共破之坐者皆懼皇考慰喻遣之於是歸
 命饋輸填積屬晉公護先退皇考亦罷兵而還
 鎮又以政績稱詔賜錢三十萬布五百匹穀二
 千斛以疾還京周武及晉公護屢臨視焉薨贈
 太保都督同朔等十三州軍事同州刺史本官
 如故謚曰桓公開皇元年追尊為武元皇帝廟
 號太祖帝武元皇帝之長子也皇妣曰呂氏以
 周大統七年六月癸丑夜生帝於馮翊波若寺

有些紫氣充庭時有尼來自河東謂皇妣曰此兒
 所從來甚異不可於俗間處之乃將帝舍於別
 館躬自撫養皇妣抱帝忽見頭上出角徧體起
 鱗墜帝于地尼自外見曰已驚我兒致令晚得
 天下帝龍額額上有五柱入頂目光外射有文
 在手曰王字長上短下沈深嚴重初入太學雖
 羣親昵不敢狎也年十四京兆尹薛善辟為功
 曹十五以皇考勳授散騎常侍車騎大將軍儀
 同三司封成紀縣公十六遷驃騎大將軍加開

府周文帝見而歎曰此兒風骨非世間人明帝
即位授右小宗伯進封大興郡公明帝嘗遣善
相者來和視帝和詭對曰不過柱國既而私謂
帝曰公當為天下君必大誅殺而後定周武帝
即位遷小宗伯出為隨州刺史進位大將軍後
徵還遇皇妣寢疾三年晝夜不離左右以純孝
稱宇文護執政尤忌帝屢將害焉賴大將軍侯
伏侯壽等救護以免後襲爵隋國公周武既為
皇太子娉帝長女為妃益加禮重齊王憲言於

周武曰普六茹堅相貌臣每見之不覺自失恐
非人下請早除之周武曰此止可為將耳內史
王軌驟諫曰皇太子非社稷主普六茹堅有反
相周武不悅曰必天命將若之何帝甚懼深自
晦匿後從周武平齊進柱國又與齊王憲破齊
任城王潛於冀州除定州總管先是州城門久
閉不行齊人白文宣時或請開之文宣不許曰
當有聖人啓之及帝至而開之莫不驚異遷亳
州總管周宣帝即位以后父徵拜上柱國大司

馬大象初遷大後丞右司武俄轉大前疑周宣
每巡幸恒委以居守時周宣為刑經聖制其法
深刻帝以法令滋章非興化之道切諫不納帝
位望益隆周宣頗以為忌時周宣四幸女並為
皇后爭寵相毀周宣每謂后曰必族滅尔家因
召帝命左右曰若色動即殺之帝容色自若遂
免大象二年五月以帝為揚州總管將發暴足
疾而止乙未周宣不念時靜帝幼冲前內史上
大夫鄭譯御正大夫劉昉以帝皇后之父衆望
所集遂矯詔引帝入侍疾因受遺輔政都督內
外諸軍事帝恐周武諸王在藩生變稱趙王招
將嫁女於突厥為詞以徵之己酉周宣崩庚戌
靜帝詔假黃鉞左大丞相百官總已而聽焉以
正陽宮為丞相府以鄭譯為長史劉昉為司馬
具置寮佐周宣時刑政峻酷者悉更以寬大之
制天下歸心矣六月趙王招陳王純越王達代
王盛滕王道並至長安相州總管尉遲迥自以
宿將至是不能平遂舉兵趙魏之士響應旬日

間衆至十餘萬宇文弼以滎州石繇以建州席毗以沛郡毗弟又羅以兗州皆應迴遣子質於陳以求援帝命上柱國鄭公韋孝寬討之雍州牧畢王賢及趙陳等五王謀作亂帝執賢斬之而掩趙王等罪因詔五王劔履上殿入朝不趨以安之時五王陰謀滋甚帝以酒肴造趙王觀其指趙王伏甲於臥內帝賴元弼以免於是誅趙越二王八月庚午韋孝寬破尉遲迴斬之傳首闕下餘黨悉平初迴之亂鄭州總管司馬消

難據州應迴淮南州縣多從之襄州總管王誼討之消難奔陳荆郢羣蠻乘釁而起命亳州總管賀若誼討平之先是上柱國王謙為益州總管亦擁衆巴蜀以匡復為辭帝以東夏山南為事未遑致討謙遂屯劔口陷始州至是乃命上柱國梁睿討平之傳首闕下隋劔閣之險以絕好亂之萌焉九月壬子周帝進帝大丞相十月周帝詔追贈皇曾祖勳為柱國太保都督十州諸軍事徐州刺史隋國公謚曰康皇祖禎為柱

國都督十三州諸軍事同州刺史隋國公謚曰
獻皇考忠為上柱國太師大冢宰都督十三州
諸軍事雍州牧壬戌誅陳王純周帝進帝大冢
宰五府總於天官十一月辛未誅代王達滕王
迥十二月甲子周帝授帝相國總百揆去都督
內外諸軍事大冢宰之号進爵為王以隋州之
崇業鄖州之安陸城陽溫州之宜人應州之平
靖上明順州之淮南士州之永川昌州之廣昌
安昌申州之義陽淮安息州之新蔡建安豫州
之汝南臨潁廣寧初安蔡州之蔡陽郢州之漢
東二十郡為隋國劔履上殿入朝贊拜不名備
九錫之禮加璽紱遠游冠相國印綠綬綬位在
諸侯王上隋國置丞相以下一依舊式帝再讓
乃授王爵十郡而已周帝詔進皇祖皇考爵並
為王夫人為王妃

大定元年二月壬子下令曰以前賜姓皆復其
舊甲寅帝受九錫之禮景辰周帝又詔帝冕十
有二旒建天子旌旗出警入蹕乘金根車駕六

馬備五時副車置旄頭雲罕樂舞八佾設鐘簋
宮縣王妃為王后世子為太子前後三讓乃受
俄而下詔依唐虞漢魏故事帝三讓不許乃遣
太傅上柱國杞國公椿奉冊曰咨爾相國隋王
粵若上古之初爰啓清濁降符受聖為天下君
事上帝而理兆庶和百靈而利萬物非以區寓
之富未以宸極為尊大庭軒轅以前驅連赫胥
之日咸以無為無欲不將不迎遐哉其詳不可
聞已厥有載籍遺文可觀聖莫逾於堯美未過

於舜堯得太尉已作運衡之篇舜遇司空便敘
菁華之竭褰裳脫屣二宮設饗百官歸禹若帝
之初斯蓋上則天時不敢不授下祇天命不敢
不受湯代於夏武革於殷干戈揖讓雖復異揆
應天順人其道靡異自漢迄晉有魏至周天曆
逐獄訟之歸神鼎隨謳歌之去道高者稱帝祿
盡者不王與夫文祖神宗無以別也周德將盡
禍難頻興宗戚姦回咸將竊發顧瞻宮闕將圖
宗社藩維連率逆亂相尋搖蕩三方不合如礪

蛇行鳥攫投足無所王受天明命獻德在躬救
頽運之艱匡墜地之業援大川之溺救燎原之
火除羣凶於城社廓祆氛於遠服至德合於造
化神用洽於天壤八極九野萬方四裔圓首方
足莫不樂推往歲長星夜掃經天晝見八風比
夏后之作五緯同漢帝之聚除舊之徵昭然在
上近者赤雀降祉玄龜效靈鍾石變音蛟魚出
穴有新之貺煥焉在下九區歸往百靈協贊人
神屬望我不獨知仰祇皇靈俯順人願敬以帝

位禪於爾躬天祚告窮天祿永終於戲王其允
執厥和儀刑典訓升圓丘而敬蒼昊御皇極而
撫黔黎副率土之心恢無疆之祚可不盛歟遣
大宗伯大將軍金城公趙襲奉皇帝璽紱百官
勸進帝乃受焉

開皇元年春二月甲子自相府常服入宮備禮
即皇帝位於臨光殿設壇於南郊遣兼太傅上
柱國鄧公竇熾柴燎告天是日告廟大赦改元
京師慶雲見改周官依漢魏之舊制以相國司

馬高頻為尚書左僕射兼納言相國司錄虞慶
則為內史監兼吏部尚書相國內郎李德林為
內史令上開府韋世康為禮部尚書上開府元
暉為都官尚書開府戶部尚書元巖為兵部尚
書上儀同司宗長孫毗為工部尚書上儀同司
會楊尚希為度支尚書雍州牧楊惠為左衛大
將軍乙丑追尊皇考為武元皇帝廟号大祖皇
妣呂氏為元明皇后改周氏左社右廟別為右
社左廟遣八使巡省風俗景寅修廟社立王后

獨孤氏為皇后王太子勇為皇太子丁卯以大
將軍趙襲為尚書右僕射以上開府伊婁彥恭
為右武侯大將軍己巳以五千戶封周帝介國
公為隋室賓旌旗車服禮樂一如其舊上書不
為表卷表不稱詔周氏諸王盡降為公辛未以
皇弟同安郡公爽為雍州牧乙亥封皇弟邵國
公蕙為滕王同安公爽為衛王皇子鴈門公為
晉王俊為秦王秀為越王諒為漢王并州總管
李穆為太師上柱國竇熾為太傅幽州總管干

萬曆二十年

七史本紀卷十一

二百三十一

何

翼為太尉觀國公田仁恭為太子太師武德郡
公柳敏為太子太保丁丑以晉王廣為并州總
管封陳留郡公智積為蔡王興城郡公靜為道
王戊寅改東京府為尚書省發官牛五千頭分
賜貧人三月宣仁門槐樹連理衆枝內附壬午
白狼國獻方物丁丑詔犬馬器翫口味不得獻
上戊子弛山澤禁己丑移盤屋連理樹植于宮
庭戊戌以太子少保蘇威兼納言吏部尚書庚
子詔前代品爵悉依舊定丁未梁蕭蕙使其太

宰蕭巖來賀夏四月辛巳大赦戊戌大常散樂
並免為編戶禁雜樂百戲辛丑陳人來聘于周
至而上巳受禪致之介國是月發稽胡修築長
城二旬而罷五月戊午封邗國公楊雄為廣平
王永康郡公楊弘為河間王辛未介公薨上舉
哀於朝堂謚曰周靜帝六月癸未詔以初受命
赤雀降祥推五德相生為火色其郊及社廟依
服冕之儀而朝會之服旗幟犧牲盡尚赤戎服
尚黃秋七月乙卯上始服黃百寮畢賀八月壬

午廢東京官甲午遣樂安公元諧擊吐谷渾於
青海破而降之九月戊申遣使振給戰亡者家
庚午陳將周羅暉攻陷胡墅蕭摩訶寇江北辛
未以越王秀為益州總管改封蜀王壬申以薛
公長孫覽宋安公元景山並為行軍元帥伐陳
仍令尚書左僕射高潁節度諸軍是月行五銖
錢冬十月乙酉百濟王扶餘昌遣使來賀授昌
上開府儀同三司帶方郡公戊子行新律壬辰
行幸岐州十一月乙卯以永富郡公竇榮定為

右武侯大將軍遣兼散騎侍郎鄭撫使於陳已
已有流星如墜牆光照於地十二月甲申以禮
部尚書韋世康為吏部尚書庚子至自岐州壬
寅高麗王高陽遣使朝貢授陽大將軍遼東郡
公太子太保柳敏卒是歲靺鞨突厥阿波可汗
沙鉢略可汗並遣使朝貢

二年春正月庚申陳宣帝殂辛酉置河北道行
臺尚書省於并州以晉王廣為尚書令置河南
道行臺尚書省於洛州以秦王俊為尚書令置

西南道行臺尚書省於益州以蜀王秀為尚書
令戊辰陳人遣使請和求歸胡墅甲戌詔舉賢
良二月己丑詔以陳有喪命高頰等班師庚寅
加晉王廣左武衛大將軍秦王俊右武衛大將
軍庚子京師雨土三月初命入宮殿門通籍戊
申開渠引杜陽水於三畝原夏四月丁丑以寧
州刺史竇榮定為左武侯大將軍庚寅大將軍
韓僧壽破突厥於雞頭山上柱國李充破突厥
於河北山五月戊申以上開府長孫平為度支

尚書己酉以旱故上親省囚徒其日大雨己未
高竇寧寇平州突厥入長城庚申以豫州刺史
皇甫績為都官尚書申子改傳國璽曰受命璽
丁卯制人年六十以上免課六月壬午以太府
卿蘇孝慈為兵部尚書甲申使使弔於陳乙酉
上柱國李充破突厥於馬邑景申詔曰朕祇奉
上玄君臨萬國屬生靈之弊處前代之宮以為
作之者勞居之者逸改創之事心未遑也而王
公大臣陳謀獻策咸云義農以降至於姬劉有

當世而屢遷無革命而不徙曹馬之後時見因循乃末世之宴安非往聖之宏義此城從漢彫殘日久屢為戰場舊經喪亂今之宮室近代權宜又非謀筮從龜瞻星揆日不足建皇王之邑合大衆所聚論變通之數具幽顯之情同心固請詞情深切然則京師百官之府四海歸向非朕一人之所獨有苟利於物其可違乎且殷之五遷恐人盡怨是則以吉凶之土制長短之命謀新去故如農望秋雖則劬勞其究安宅今區

寓寧一陰陽順序安安以遷勿懷胥怨龍首山川原秀麗升物滋阜卜食相土宜建都邑定鼎之基永固無窮之業在斯公私府宅規模遠近營構資須隨事修葺仍詔左僕射高潁將作大匠劉龍鉅鹿郡公賀婁子幹太府少卿高龍義等創造新都秋七月癸巳詔新置都處墳墓令悉遷葬設祭仍給人功無主者命官為殯葬甲午行新令冬十月以撤毀故徙居東宮給內外官人祿矣西皇太子勇屯兵咸陽以備胡虜庚

寅上疾愈享百寮於觀德殿賜錢帛皆令自取
盡力以出辛卯以營新都副監賀婁子幹為工
部尚書十一月景午初命為方陣戰法及制軍
營圖樣下諸軍府以擬征突厥十二月辛未上
講武于後園甲戌上柱國竇毅卒景子名新都
曰大興城乙酉遣彭城公虞慶則屯弘化以備
胡突厥寇周槃行軍總管達奚長儒為虜所敗
景戌賜國子生經明者束帛丁亥親錄囚徒是
歲高麗百濟並遣使朝貢

三年春正月庚子將遷新都大赦禁大刀長稍
始令人以二十一成丁歲役功不過二十日不
役者收庸廢遠近酒坊罷鹽井禁二月己巳朔
日有蝕之癸酉陳人來聘突厥犯邊癸未以左
武衛大將軍李禮成為右武衛大將軍三月丁
未上柱國鮮虞縣公謝慶恩卒景辰以雨故常
服入新都京師承明里醴泉出丁巳詔購遺書
於天下癸亥城榆關夏四月己巳衛王爽大破
突厥於白道山停築原陽雲內紫河等鎮而還

上柱國建平郡公于義卒庚午吐谷渾寇臨洮
洮州刺史皮子信死之壬申以尚書右僕射趙
襲兼內史令丁丑以滕王瓚為雍州牧庚辰行
軍總管陰壽大破高寶寧于黃龍甲申以旱故
上親祀兩師景戌詔天下勸學行禮己丑陳郢
州城主張子譏遣使請降上和好不納辛卯
遣兼散騎常侍薛舒聘于陳癸巳上親雩五月
癸卯太尉任城公于翼薨行軍總管李晃破突
厥於摩那渡口乙巳梁太子蕭琮來賀遷都辛
酉親祀方澤壬戌行軍元帥竇榮定破突厥及
吐谷渾於涼州赦黃龍死罪以下六月庚午封
衛王爽子集為遂安郡王戊寅突厥遣使求和
庚辰行軍總管梁遠破吐谷渾於余汗山斬其
名王秋七月壬戌詔曰往者山東河表經此妖
亂孤城遠守多不自全濟陰太守杜猷身陷賊
徒命懸寇手郡省事范臺政傾產營護免其戮
辱眷言誠節實有可嘉宜超恒賞用明沮勸臺
政可大都督假湘州刺史丁卯日有蝕之八月

壬午遣尚書右僕射高頴出寧州道吏部尚書
虞慶則出原州道並為行軍元帥以擊胡戊子
親祀太社九月壬子幸城東觀穀稼癸丑大赦
冬十月甲戌廢河南道行臺省十一月發使巡
省風俗庚辰陳人來聘陳主知帝兒異世人使
副使袁彥圖像而去甲午罷天下諸郡十二月
乙卯遣兼散騎常侍唐令則使於陳戊午以刑
部尚書蘇威為戶部尚書是歲高麗突厥靺鞨
並遣使朝貢

四年春正月甲子朔日有蝕之祀太廟辛未祀
南郊壬申梁主蕭歸來朝甲戌大射於北苑十
日而罷壬午齊州水辛卯渝州獲獸似麋一角
同蹄壬辰班新曆二月乙巳上餞梁主于霸上
庚戌行幸隴州突厥可汗阿史那玷厥率其屬
來降夏四月己亥勅總管刺史父母及子年十
五以上不得將之官庚子以吏部尚書虞慶則
為尚書右僕射瀛州刺史楊尚希為兵部尚書
毛州刺史劉仁恩為刑部尚書五月癸酉契丹

主莫賀弗遣使請降拜大將軍六月庚子降囚
徒壬子開通濟渠自渭達河以通運漕甲寅制
官人非戰功不授上柱國以下戎官以雍同華
岐宜五州旱命無出今年租調戊午秦王俊來
朝秋七月景寅陳人來聘八月甲午遣十使巡
省天下戊戌衛王爽來朝壬寅上柱國太傅鄧
公竇熾薨乙卯陳將夏侯苗請降上以通和不
納九月己巳上親錄囚徒庚午契丹內附甲戌
以關中饑行幸洛陽冬十一月壬戌遣兼散騎

常侍薛道衡使於陳甲戌改周十二月為臘蜡
是歲靺鞨及女國並遣使朝貢

五年春正月戊辰詔行新禮壬辰詔罷江陵總
管其後梁主請依舊許之三月戊午以尚書左
僕射高頴為左領軍大將軍以上柱國宇文忻
為右領軍大將軍夏四月甲午契丹遣使朝貢
壬寅上柱國王誼謀反誅乙卯詔徵山東大儒
馬榮伯等戊申車駕至自洛陽五月甲申初置
義倉梁主蕭歸殂遣上大將軍元契使于突厥

阿波可汗秋七月庚申陳人來聘壬午突厥沙
鉢略可汗上表稱臣八月甲辰河南諸州水遣
戶部尚書蘇威振給之戊申有流星數百四散
而下九月乙丑改鮑陂曰杜陂霸水曰滋水景
子遣兼散騎常侍李若使於陳冬十一月丁卯
晉王廣來朝十二月丁未降囚徒

六年春正月甲子党項羌內附庚子班曆於突
厥壬申使戶部尚書蘇威巡省山東二月乙酉
山南荆浙七州水遣前工部尚書長孫毗振恤

之景戌制刺史上佐每歲暮更入朝上考課丁
亥發丁男十一萬修築長城二旬而罷庚子大
赦三月己未洛陽男子高德上書請帝為太上
皇傳位皇太子帝曰朕承天命撫育蒼生日旰
孜孜猶恐不逮豈學近代帝王事不師古傳位
於子自求逸樂哉癸亥突厥沙鉢略可汗遣使
朝貢夏四月己亥陳人來聘秋七月辛亥河南
諸州水乙丑京師雨毛如馬尾長者二尺餘短
者有六七寸八月辛卯關內七州旱蠲其賦稅

遣散騎常侍裴世豪使于陳戊申上柱國大師
申公李穆薨閏月丁卯皇太子鎮洛陽辛未晉
王廣秦王俊並來朝景子上柱國郕公梁士彥
上柱國杞公宇文忻柱國舒公劉昉謀反伏誅
上柱國許公宇文善有罪除名九月辛巳帝素
服御射殿詔百寮射賜梁士彥三家資物景戌上
柱國宋安公元景山卒辛丑詔振恤大象以來
死事之家冬十月己酉以河北道行臺尚書令
并州總管晉王廣為雍州牧餘官如故以兵部

尚書楊尚希為禮部尚書癸丑置山南道行臺
尚書省於襄州以秦王俊為尚書令
七年春正月癸巳祀太廟乙未制諸州歲貢三
人二月丁巳祀朝日於東郊己巳陳人來聘壬
申幸醴泉宮是月發丁男十萬修築長城一旬
而罷夏四月庚戌於揚州開山陽瀆以通運漕
突厥沙鉢略可汗卒癸亥頒青龍符於東方總
管刺史西方以白虎南方以朱雀北方以玄武
甲戌遣兼散騎常侍楊周使于陳以戶部尚書

蘇威為吏部尚書五月乙亥朔日有蝕之己卯
隕石於武安滏陽間十餘里秋七月己丑衛王
爽薨八月庚申梁主蕭琮來朝九月乙酉梁安
平王蕭巖掠於其國以奔陳辛卯廢梁國曲赦
江陵以梁主蕭琮為柱國封莒國公冬十月庚
申行幸同州以先帝所居故曲降囚徒癸亥幸
蒲州景寅宴父老上極歡曰此間人物衣服鮮
麗容止閑雅良由仕宦之鄉陶染成俗也十一
月甲午幸馮翊祭故社父老對詔失旨上大怒
免其縣官而去戊戌車駕至自馮翊

八年春正月乙亥陳人來聘二月辛酉陳人寇
硤州三月辛未上柱國隴西公李詢卒甲戌遣
兼散騎常侍程尚賢使於陳戊寅詔大舉伐陳
秋八月丁未河北諸州飢遣吏部尚書蘇威振
恤之九月癸巳嘉州言龍見冬十月己未置淮
南行臺省於壽春以晉王廣為尚書令辛酉陳
人來聘拘畱不遣甲子有星孛於牽牛享太廟
授律令晉王廣秦王俊清河公楊素並為行軍

萬曆二十年

七史本紀卷二

高

三頁

召

元帥以伐陳於是晉王出六合秦王出襄陽清河公楊素出信州荊州刺史劉仁恩出江陵宜陽公王世積出蘄春新義公韓擒出廬江襄邑公賀若弼出吳州落叢公燕榮出東海合總管九十兵五十一萬八千皆受晉王節度東接滄海西拒巴蜀旌旃舟楫橫亘數千里仍曲赦陳國十一月丁卯車駕餞師詔購陳叔寶位上柱國萬戶公乙亥行幸定城陳師誓衆景子幸河東十二月車駕至自河東

九年春正月癸酉以尚書左僕射虞慶則為右衛大將軍景子賀若弼敗陳師於蔣山獲其將蕭摩訶韓擒進師入建鄴獲陳主叔寶陳國平合州四十郡一百縣四百戶五十萬口二百萬癸巳遣使持節巡撫之二月乙未廢淮南尚書省景申制五百家為鄉正一人百家為里長一人夏四月己亥幸驪山親勞旋師乙巳三軍凱入獻俘於太廟以晉王廣為太尉庚戌帝御廣陽門宴將士頒賜各有差辛亥大赦以陳都官

尚書孔範散騎常侍王差王儀御史中丞沈觀等邪佞於其主以致亡滅皆投之邊裔陳人普給復十年軍人畢世免徭役擢陳之文武衆才而用之宮奴數千可歸者歸之其餘盡以分賜將士及王公貴臣其資物皆於五塚賜王公以下大射毀所得秦漢三大鐘越二大鼓又設亡陳女樂謂公卿等曰此聲似啼朕聞之甚不喜故與卿等一聽亡國之音俱為永鑒焉辛酉以吏部侍郎宇文弼為刑部尚書宗正卿楊昇為

工部尚書壬戌詔曰今率土大同含生遂性兵可立威不可不戢刑可助化不可專行禁衛九重之餘鎮守四方之外戎旅軍器皆宜停罷武力之子俱可學文人間甲仗悉皆除毀閏月丁丑頒木魚符於總管刺史雌一雄三己卯以吏部尚書蘇威為尚書右僕射六月乙丑以荊州總管楊素為納言丁卯以吏部侍郎盧愷為禮部尚書時羣臣咸請封禪詔不許曰豈可命一將軍除一小國以薄德而封名山用虛言而干

上帝邪八月壬戌以廣平王雄為司空冬十一月壬辰考使定州刺史豆盧通等上表請封禪上不許庚子以右衛大將軍虞慶則為右武侯大將軍右領軍將軍李安為右領軍大將軍甲寅降囚徒十二月甲子詔太常卿牛弘通直散騎常侍許善心祕書丞姚察通直郎虞世基等議定樂

十年春正月乙未以皇孫昭為河南王楷為華陽王二月庚申行幸并州夏五月乙未詔曰魏

末喪亂寓縣瓜分役軍歲動未遑休息兵士軍人權置坊府南征北伐居處無定家無完堵地罕苞桑恒為流寓之人竟無鄉里之號朕甚愍之凡是軍人可悉屬州縣墾田籍帳一同編戶軍府統領宜依舊式罷山東河南及北方緣邊之地新置軍府六月辛酉制人年五十免役折庸秋七月癸卯以納言楊素為內史令庚戌上親錄囚徒辛亥高麗遼東郡公高陽卒八月壬申遣柱國韋洸上開府王景並持節巡撫嶺南

百越皆服九月丁酉至自并州冬十月甲子頒
木魚符於京官五品以上十一月辛卯幸國學
頒賜各有差辛丑祀南郊是月婺州人汪文進
會稽人高智慧蘇州人沈玄愔皆舉兵反自稱
天子樂安蔡道人饒州吳世華永嘉沈孝徹泉
州王國慶餘杭楊寶英交趾李春等皆自稱大
都督詔內史令楊素討平之是歲吐谷渾契丹
並遣使朝貢

十一年春正月丁酉以平陳所得古器多為祆

變悉命毀之景午皇太子加元氏薨上舉哀於
東宮文思殿二月戊午以大將軍蘇孝慈為工
部尚書景子以臨潁令劉曠政績尤異擢為莒
州刺史辛巳晦日有蝕之夏五月乙巳以右衛
將軍元旻為左衛大將軍秋八月壬申滕王瓚
薨乙亥上柱國沛國公鄭譯卒是歲高麗靺鞨
並遣使朝貢突厥獻七寶盃
十二年春二月己巳以蜀王秀為內史令兼右
領軍大將軍以漢王諒為雍州牧右衛大將軍

秋十月己巳尚書右僕射邳公蘇威禮部尚書
容城侯盧愷並坐事除名壬申晦日有蝕之八
月甲戌制天下死罪諸州不得便決皆令大理
覆之癸巳制宿衛者不得輒離所守丁酉上柱
國楚公豆盧勣卒戊戌上親錄囚徒冬十月丁
丑以遂安王集為衛王壬午祀太廟至太祖神
主前帝流涕嗚咽不自勝十一月辛亥祀南郊
己未上柱國新義公韓擒卒甲子百寮大赦於
武德殿十二月乙酉以內史令楊素為尚書右

僕射是歲突厥吐谷渾靺鞨並遣使朝貢

十三年春正月乙巳上柱國郇公韓建業卒壬
子祀感帝己未以信州總管韋世康為吏部尚
書壬戌行幸岐州二月景子詔營仁壽宮丁亥
至自岐州己卯立皇孫暕為豫章王戊子晉州
刺史南陽郡公賈悉達隰州總管撫寧郡公韓
延等以賄伏誅己丑制坐事去官者配防一年
丁酉制私家不得隱藏緯候圖讖夏五月癸亥
詔禁人間撰集國史臧否人物秋七月戊辰晦

日有蝕之九月景辰降囚徒庚申封邵公揚綸
為滕王冬十一月乙卯上柱國華陰公梁彥光
卒是歲契丹霽室韋靺鞨並遣使朝貢

十四年夏四月乙丑詔曰比命有司總令研究
正樂雅聲詳定已訖宜即施用見行者停人間
音樂流僻日久棄其舊體競造繁聲流宕不歸
遂以成俗宜加禁約務存其本五月辛酉京師
地震關內諸州旱六月丁卯詔省府州縣皆給
廩田不得興生與人爭利秋七月乙未以邳公

蘇威為納言八月辛未關中大旱人飢行幸洛
陽并命百姓山東就食冬閏十月甲寅詔曰梁
齊陳往皆創業一方綿歷年代既宗祀廢絕祭
奠無主興言矜念良以愴然莒國公蕭琮及高
仁英陳叔寶等宜令以時世修祭祀所須器物
有司給之乙卯制外官九品以上父母及子年
十五不得從之官十一月壬戌制州縣佐史三
年一代不得重任癸未有星孛于角亢十二月
乙未東巡狩

十五年春正月壬戌車駕次齊州親問疾苦景
寅旅王符山庚午以歲旱祀太山以謝愆咎大
赦二月景辰禁私家畜兵器關中緣邊不在其
例禁河以東無得乘馬丁巳上柱國蔣公梁睿
卒三月己未車駕至自東巡望祭五嶽海瀆丁
亥幸仁壽宮夏四月己丑朔大赦甲辰以趙州
刺史楊達為工部尚書五月丁亥制京官五品
以上佩銅魚符六月戊子詔鑿砥柱庚寅相州
刺史豆盧道貢綾文布命焚之於朝堂辛丑詔

名山未在祀典者悉命祀之秋七月甲戌遣
公蘇威巡省江南戊寅至自仁壽宮辛巳制九
品以上官以理去官者並聽執笏冬十二月戊
子敕盜邊糧一升以上皆斬籍沒其家己丑詔
文武官以四考更代是歲吐谷渾林邑等國並
遣使朝貢

十六年春二月丁亥封皇孫裕為平原王筠為
安成王嶷為安平王恪為襄城王該為高陽王
韶為建安王瑒為潁川王夏六月甲午制工商

不得進仕并州大蝗辛丑詔九品以上妻五品
以上妾夫亡不得改嫁秋八月庚戌詔決死罪
者三奏而後行刑冬十月己丑幸長春宮十一
月壬子至自長春宮

十七年春二月癸未太平公史萬歲伐西寧尅
之庚寅行幸仁壽宮庚子上柱國王世積討桂
州賊李光仕平之三月景辰詔諸司屬官有犯
聽於律令外斟酌決杖辛酉上親錄囚徒癸亥
上柱國彭城公劉昶以罪伏誅庚午遣御史柳

或皇甫誕巡省河南北夏四月戊寅頒新曆五
月庚申宴百寮於玉女泉班賜各有差己巳蜀
王秀來朝閏月己卯羣鹿入殿門馴擾侍衛之
內秋七月丁丑桂州人李世賢反遣右武侯大
將軍虞慶則討平之丁亥并州總管秦王俊坐
事免以王就第九月甲申車駕至自仁壽宮庚
寅上謂侍臣曰廟庭設樂本以迎神齋祭之日
觸目多感當此之際何可為心在路奏樂禮為
未允公卿宜更詳之冬十月丁未頒銅武符於

驃騎車騎府戊申道王靜薨庚午詔曰五帝異
樂三王殊禮皆隨事而有損益因情而立節文
仰惟祭享宗廟瞻敬如在罔極之感情深茲日
而禮畢升路鼓吹發音還入宮門金石振響斯
則哀樂同日心事相違情所不安理寔未允宜
改茲往式用弘禮教自今享廟日不須備鼓吹
殿庭勿設樂縣辛未京下大索十二月壬子上
柱國右武侯大將軍魯公虞慶則以罪伏誅是
歲高麗突厥並遣使朝貢

十八年春正月辛丑詔曰吳越之人往承弊俗
所在之處私造大船因相聚結致有侵害江南
諸州人間有船長三丈以上悉括入官二月甲
辰幸仁壽宮乙巳以漢王諫為行軍元帥水陸
三十萬伐高麗夏五月辛亥詔畜猫鬼蠱毒厭
魅野道之家投于四裔六月景寅詔黜高麗王
高元官爵秋八月景子詔京官五品以上總管
刺史舉志行修謹清平幹濟之士九日己丑漢
王諫師遇疾疫而旋死者十二三庚寅敕舍客

月

無公驗者坐及刺史縣令辛卯車駕至自仁壽
宮冬十一月甲戌帝親錄囚徒癸未祀南郊十
二月庚子上柱國夏州總管東萊公王景以罪
伏誅是歲自京師至仁壽宮置行宮十所祀宋
陳毫曹戴頴等州水詔並免庸調

十九年春正月癸酉大赦戊寅大射于武德殿
二月己亥晉王廣來朝甲寅幸仁壽宮夏四月
丁酉突厥利可汗內附達頭可汗犯塞行軍總
管史萬歲擊破之六月丁酉以豫章王暕為內

史令秋八月癸卯上柱國尚書左僕射齊公高
頴坐事免辛亥上柱國皖城公張威卒甲寅上
柱國城陽公李徹卒九月乙丑以太常卿牛弘
為吏部尚書冬十月甲午突厥利可汗為啓
人可汗築大利城處其部落十一月有司言元
年已來日漸長十二月乙未突厥都藍可汗為
部下所殺國大亂星隕於勃海

二十年春正月辛酉朔突厥高麗契丹並遣使
朝貢二月丁丑無雲而雷三月辛卯熙州人李

英林反遣行軍總管張衡討之夏四月壬戌突厥犯塞以晉王廣為行軍元帥擊破之乙亥天有聲如寫水自南而北六月丁丑秦王俊薨秋九月丁未車駕至自仁壽宮冬十月乙丑廢皇太子勇及其諸子並為庶人殺柱國太平公史方歲己巳殺左衛大將軍五原公元旻十一月戊子以晉王廣為皇太子天下地震京城大風雪十二月戊午詔東宮官屬於皇太子不得稱臣辛巳詔毀壞偷盜佛及天尊像嶽鎮海瀆神

形者以不道論沙門壞佛像道士壞天尊像以惡逆論

仁壽元年春正月乙酉朔大赦改元以尚書右僕射楊素為左僕射以納言蘇威為右僕射丁酉徙河南王昭為晉王突厥寇恒安遣柱國韓洪擊之敗焉以晉王昭為內史令辛丑詔曰投生殉節自古稱難殞身王事禮加二等而世俗之徒不達大義致命戎旅不入兆域興言念此每深愍歎且入廟祭祀並不廢闕何止墻塋獨

在其外自今戰亡之徒宜入墓域二月乙卯朔日有蝕之夏五月己丑突厥男女九萬餘口來降壬辰驟雨震雷大風拔木宜君湫水移於始平六月乙卯遣十六使巡省風俗乙丑廢太學及州縣學唯留國子一學取正三品以上子七十二人充生頒舍利於諸州秋七月戊戌改國子為太學十一月己丑祀南郊十二月楊素擊突厥大破之

二年春三月己亥幸仁壽宮夏四月庚戌岐雍

二州地震秋七月景戌詔內外官各舉所知八月己巳皇后獨孤氏崩九月景戌車駕至自仁壽宮壬辰河南北諸州大水遣工部尚書楊達振恤之乙未上柱國袁州總管金水公周搖卒隴西地震冬十月壬子曲赦益州管内癸丑以工部尚書楊達為納言閏月甲申詔尚書左僕射楊素與諸術者刊定陰陽舛謬己丑詔楊素右僕射蘇威吏部尚書牛弘內史侍郎薛道衡祕書丞許善心內史舍人虞世基著作郎王劭

等修定五禮壬寅葬獻皇后於太陵十二月癸巳益州總管蜀王秀有罪廢為庶人交州人李佛子舉兵反遣行軍總管劉方討平之

三年春二月戊子以大將軍蔡陽郡公姚辯為左武侯大將軍夏五月癸卯詔曰六月十三日是朕生日其日令海內為武元皇帝元明皇后斷屠六月甲午詔曰禮云親以朞斷蓋以四時之變易萬物之更始故聖人象之其有三年加隆爾也但家無二尊母為厭降是以父在喪母

還服于朞者服之正也豈容朞內而更小祥然三年之喪而有小祥者禮云朞祭禮也朞而除喪道也以是之故雖未再朞而天地一變不可不祭不可不除故有練焉以存喪祭之本然朞喪有練於理未安雖云十一月而練乃無所法象非朞非時豈可除祭而儒者徒擬三年之喪立練禫之節可謂苟存其變而失其本欲漸於奪乃薄於喪致使子則冠練去經黃裏繚緣經則布葛在躬麤服未改豈非經哀尚存子情已

奎親踈失倫輕重顛倒乃不順人情豈聖人之
意也故非先聖之禮廢於人邪三年之喪尚有
不行之者至於祥練之節安能不墜者乎禮云
父母之喪無貴賤一也而大夫士之喪父母乃
貴賤異服然則禮壞樂崩由來漸矣所以晏平
仲之斬麤練其老謂之非禮滕文公之服三年
其臣咸所不欲蓋由王道既衰諸侯異政將踰
越於法度惡禮制之害已乃減去篇籍自制其
宜遂至骨肉之恩輕重從俗無易之道降殺任

情天禮不從天降不從地出乃人心而已者謂
情緣於恩也故恩厚者其禮隆情輕者其禮殺
聖人以是稱情立文別親踈貴賤之節自臣子
道消上下失序莫大之恩遂情而薄莫重之化
與時而殺此乃服不稱喪容不稱服非所謂聖
人緣恩表情制禮之義也然喪與其易也寧在
於戚則禮之本也禮有其餘未若於哀則情之
實也今十一月而練者非禮之本非情之實由
是言之父在喪母不宜有練但依禮十三月而

祥中月而禫庶以合聖人之意達人子之心秋
七月丁卯詔州縣搜揚賢哲皆取明知古今通
識安危究政教之本達禮樂之源不限多少不
得不舉徵召將送必須以禮八月壬申上柱國
檢校幽州總管落藜公燕榮以罪伏誅九月壬
戌置常平官甲子以營州總管韋冲為戶部尚
書十二月癸酉河南諸州遣納言楊達振恤之
四泮春正月景辰大赦甲子辛仁壽宮夏四月
乙卯上不豫六月庚午大赦有星入月中數日

而退長人見於鴈門秋七月乙未日青無光八
日乃復甲辰帝疾甚臥於仁壽宮與百寮辭訣
上握手歔歔丁未崩于大寶殿時年六十四詔
曰嗟乎自昔晉室播遷天下喪亂四海不一以
至周齊戰爭相尋年將三百故割疆土者非一
所稱帝王者非一人書軌不同生靈塗炭上天
降監受命于朕用登大位豈關人力故當撥亂
反正偃武修文天下大同聲教遠被此又是天
意欲寧區夏所以昧旦臨朝不敢逸豫一日万

機留心親覽晦明寒暑不憚劬勞匪曰朕躬蓋
為百姓故也王公卿士每日闕庭刺史以下歲
時朝集何嘗不罄竭心府誠敕殷勤義乃君臣
情兼父子庶藉百寮之智萬國歡心欲令率土
之人永得安樂不謂遘疾彌留至於大漸此乃
人生常分何足言及但四海百姓衣食不豐教
化政刑猶未盡洽與言念此唯以留恨朕今踰
六十不復稱夭但筋力精神一時勞竭如此之
事本非為身止欲安養百姓所以致此人生子

孫誰不念愛既為天下事須割情勇及秀等竝
懷悖惡既無臣子之心所以黜廢古人有云知
臣莫若君知子莫若父公勇秀得志共理家國
亦當戮辱遍於公卿酷毒流於人庶今惡子孫
已為百姓黜屏好子孫足堪負荷大業此雖朕
家事理不容隱前對文武侍衛具已論述皇太
子廣地居上嗣仁孝著聞以其行業堪成朕志
但念內外群官同心戮力以此共安天下朕雖
瞑目何所復恨國家大事不可限以常禮既葬

公除行之自昔今宜遵用不勞改定凶禮所須
纔令周事務從節儉不得勞人諸州總管刺史
以下宜率其職不須奔赴自古哲王因人作法
前帝後帝沿革隨時律令格式有不便於事者
宜依前修改務當政要嗚呼敬之哉無墜朕命
乙卯發喪河間楊柳四株無故黃落既而花葉
復生八月丁卯梓宮至自仁壽宮景子殯於大
興前殿十月乙卯葬於太陵同墳而異穴士庶
赴葬者皆聽入視陵內帝性嚴重有威容外質

木而內明敏有大略初得政之始群情不附諸
子幼弱內有六王之謀外致三方之亂握強兵
居重鎮者皆周之舊臣上推以赤心各盡其用
不踰期月剋定三邊未及十年平一四海薄賦
斂輕刑罰內修制度外撫戎夷每旦聽朝日仄
忘倦居處服翫務存節儉令行禁止上下化之
開皇仁壽之間丈夫不衣綾綺而無金玉之飾
常服率多布帛裝帶不過以銅鐵骨角而已雖
畱於財至於賞賜有功亦無所愛惜每乘輿四

出路逢上表者駐馬親自臨問或潛遣行人采聽風俗吏政得失人間疾苦無不留意嘗遇關中飢遣左右視百姓所食有得豆屑雜糠而奏之者上流涕以示羣臣深自咎責為之損膳而不御酒肉者殆將一期及東拜太山關中戶口就食洛陽者道路相屬帝敕斥候不得輒有驅逼男女參廁於仗衛之間遇逢扶老携幼者輒引馬避之慰勉而去至艱險之處見負擔者遽令左右扶助之其有將士戰歿必加優賞仍令

使者就家勞問自強不息朝夕孜孜人庶殷繁帑藏充實雖未能致臻於至道亦足稱近代之良主然雅性沈猜素無學術好為小數言神燭聖杖堪能療病又信王劭解石文以為己瑞焉不達大體如是故忠臣義士莫得盡心竭辭其草創元勳及有功諸將誅夷獲罪罕有存者又不悅詩書楊素為之希旨遂奏除學校唯婦言是用廢黜諸子逮於暮年持法尤峻喜怒失常果於殺戮嘗令左右送西域朝貢使出關其人

所經之處受牧宰小物饋鸚鵡麋皮馬鞭之屬
聞而大怒又詣武庫見署中蕪穢不理於是執
武庫令及諸受遺者出開遠門外親自臨決死
者數十人又往往潛令賂遺令史府史受者必
死無所寬貸議者以此少之

論曰隋文皇開基立本積德累仁徒以外戚之
尊受托孤之任與能之議未為所許是以周室
舊臣咸懷憤惋既而主謙固三蜀之阻不踰期
月尉遲迴舉全齊之衆一戰而亡斯乃非止人

謀抑亦天之所贊乘茲機運遂遷周鼎于時蠻
夷猾夏荆揚未一劬勞日又經營四方樓船南
邁則金陵失險驃騎北指則單于款塞職方所
載竝入疆理高貢所圖咸受正朔雖晉武之克
平吳會漢宣之推亡固存比義論功不能尚也
七德既敷九歌已洽尉候無警遐邇肅清於是
躬節儉平徭賦倉廩實法令行君子咸樂其生
小人各安其業強不陵弱衆不暴寡人物殷阜
朝野歡娛自開皇二十年間天下無事區宇之

內晏如也考之前王足以參蹤盛烈而素無術
業不能盡下無寬仁之度有刻薄之資暨乎暮
年此風愈扇又雅好瑞符暗於大道建彼維城
權侔京室皆同帝制靡所適從聽妬婦之言惑
邪臣之說溺寵廢嫡託付失所滅父子之道開
昆弟之隙縱其尋斧翦伐本根墳土未乾子孫
繼踵為戮松檟纒列天下已非隋有惜哉迹其
衰怠之源稽其亂亡之兆起自文皇成於煬帝
所由來遠矣非一朝一夕其不祀忽諸未為不

平也

記下第十二

北史十二

高祖諱廣一名爽小字阿曷高祖第二子也
母曰文獻獨孤皇后上美姿儀少敏慧高祖及
后於諸子中特所鍾愛在周以高祖勳封鴈門
郡公開皇元年立為晉王拜柱國并州總管時
年十三尋授武衛大將軍

本紀上第十一

北史十一

二十一年

北史卷十一

四

十八

甲寅歲八月初八夜一見史十一林學公

傳京堂皆用帝制... 臣之說... 弟之... 墮為... 不忠之... 卒也

隋本紀下第十二

煬皇帝諱廣一名英小字阿摩高祖第二子也
母曰文獻獨孤皇后上美姿儀少敏慧高祖及
后於諸子中特所鍾愛在周以高祖勲封鴈門
郡公開皇元年立為晉王拜柱國并州總管時
年十三尋授武衛大將軍進上柱國河北道行
臺尚書令大將軍如故高祖令項城公歆安道
公才李徹輔導之上好學善屬文沈深嚴重朝
野屬望高祖密令善相者來和徧視諸子和曰

萬曆二十年刊 七百六已未 三百二十五册

晉王眉上雙骨隆起貴不可言既而高祖幸上所居第見樂器絃多斷絕又有塵埃若不用者以為不好聲妓之翫上尤自矯飾當時稱為仁孝嘗觀獵遇雨左右進油衣上曰士卒皆濡濕我獨衣此乎乃令持去六年轉淮南道行臺尚書令其年徵拜雍州牧內史令八年冬大舉伐陳以上為行軍元帥及陳平執陳湘州刺史施文慶散騎常侍沈客卿市令湯慧朗刑法監徐析尚書都令史暨慧以其邪佞有害於民斬之

石闕下以謝三吳於是封府庫資財無所取下稱賢進位太尉賜路車乘馬袞冕之服玄珪白璧各一雙復拜并州總管俄而江南高智慧等相聚作亂徙上為揚州總管鎮江都每歲一朝高祖之祠太山也領武侯大將軍明年歸藩後數載突厥寇邊復為行軍元帥出靈武無虜而旋及太子勇廢立上為皇太子是月當受冊高祖曰吾以大興公成帝業今上出舍大興其夜烈風大雪地震山崩民舍多壞壓死者百餘

仁壽初奉詔巡撫東南是後高祖每避暑仁壽宮恒令上監國四年七月高祖崩上即皇帝位於仁壽宮八月奉梓宮還京師并州總管漢王諒舉兵反詔尚書左僕射楊素討平之九月乙巳以備身將軍崔彭為左領軍大將軍十一月乙未幸洛陽景申發丁男十數万掘塹自龍門東接長平汲郡抵臨清關度河至浚儀襄城達于上洛以置關防癸丑詔曰乾道變化陰陽所以消息沿創不同生靈所以順序若使天意

不變施化何以成四時人事不易為政何以利万姓易不云乎通其變使民不倦變則通通則久有德則可久有功則可大朕又聞之安安而能遷民用丕變是故姬邑两周如武王之意殷人五徙成湯后之業若不因民順天功業見乎變愛民治國者可不謂然歟雒邑自古之都王畿之內天地之所合陰陽之所和控以三河固以四塞水陸通貢賦等故漢祖曰吾行天下多矣唯見雒陽自古皇王何嘗不留意所不都者

蓋有由焉或以九州未一或以困其府庫作雒之制所以未暇也我有隋之始便欲創茲懷雒日復一日越暨于今念茲在茲興言感哽朕肅膺寶曆纂臨萬邦遵而不失心奉先志今者漢王諒悖逆毒被山東遂令州縣或淪非所由關河懸遠兵不赴急加以并州移戶復在河南周遷殷民意在於此况復南服遐遠東夏殷大因機順動今也其時群司百辟僉諧厥議但成周墟堵弗堪胥宇今可於伊雒營建東宮便即設

宮分職以為民極也夫宮室之制本以便生人上棟下宇足以避風露高臺廣廈豈曰適形故傳云儉德之恭侈惡之大宣尼有云與其不遜也寧儉豈謂瑤臺瓊室方為宮殿者乎土堦采椽而非帝王者乎是知非天下以奉一人乃一人以主天下也民惟國本本固邦寧百姓足孰與不足今所營構務從節儉無令雕牆峻宇復起於當今欲使卑宮菲食將貽於後世有司明為條格稱朕意焉十二月乙丑以右武衛將軍

來護兒為右驍衛大將軍戊辰以柱國李景為
右武衛大將軍以右衛率周羅暉為右武侯大
將軍

大業元年春正月壬辰朔大赦改元立妃蕭氏
為皇后改豫州為溱州洛州為豫州廢諸州總
管府景申立晉王昭為皇太子丁酉以上柱國
宇文述為左衛大將軍上柱國郭衍為左武衛
大將軍延壽公于仲文為右衛大將軍己亥以
豫章王暕為豫州牧戊申發八使巡省風俗下

詔曰昔者哲王之理天下也其在愛民乎既富
而教家給人足故能風教淳厚遠至邇安理定
功成率由斯道朕恭嗣寶位撫育黎獻夙夜戰
兢若臨川谷雖則聿遵先緒弗敢失墜永言政
術多有缺然况以四海之遠兆民之衆未獲親
臨問其疾苦每慮幽仄莫舉寃屈不申一物失
所用傷和氣萬方有罪責在朕躬所以興寤增
歎而夕惕載懷者也今既布政惟始宜存寬大
可分遣使人巡省方俗宣揚風化薦拔淹滯申

達幽枉孝悌力田給以優復鰥寡孤獨不能自
存者量加振濟義夫節婦旌表門閭高年之老
加其板授竝依別條賜以粟帛篤疾之徒給侍
丁者雖有侍養之名曾無調贍之實明加檢校
使得存養若有名行顯著操履修潔及學業才
能一藝可取咸宜訪採將身入朝所在州縣以
禮發遣其蠹政害人不便於時者使還之日具
錄奏聞已酉以吳州總管宇文弼為刑部尚書
二月己卯以尚書左僕射楊素為尚書令三月

丁未詔尚書令楊素納言楊達將作大匠宇文
愷營建東京徙豫州郭下居民以實之戊申詔
曰聽採輿頌謀及黎庶故能審政刑之得失是
知昧旦思治欲使幽枉必達彝倫有章而牧宰
任稱朝委苟為僥倖以求考課虛立殿最不存
理實綱紀於是不理冤屈所以莫申關河重阻
無由自達朕故建立東京躬親存問今將巡歷
淮海觀省風俗眷求讜言徒繁詞翰而鄉校之
內闕介無聞恇然夕惕用勞興寢其民下有知

州縣官人政理苛刻侵害百姓背公徇私不便於民者聽詣朝堂封奏庶乎四聰以達天下無寃又於阜澗營顯仁宮採海內奇禽異獸草木之類以實園苑徙天下富商大賈數萬家於東京辛亥發河南諸郡男女七百萬開通濟渠自西苑引穀洛水達于河自板渚引河通于淮庚申遣黃門侍郎王弘上儀同於士澄往江南採木造龍舟鳳艣黃龍赤艦樓船等數萬艘夏四月癸亥大將軍劉仲方擊林邑破之五月庚戌

戶部尚書義豐侯韋沖卒甲子熒惑入太微秋七月丁酉制戰亡之家給復十年景午滕王倫衛王集竝奪爵徙邊閏七月甲子以尚書令楊素為太子太師安德王雄為太子太傅河間王弘為太子太保景子詔曰君民建國教學為先移風易俗必自茲始而言絕義乖多歷年代進德修業其道浸微漢採坑焚之餘不絕如線晉承板蕩之運掃地將盡自時厥後軍國多虞雖復黷宇時建示同愛禮函丈或陳殆為虛器遂

使紆青拖紫非以學優製錦操刀類多牆面上
陵下替綱維不立雅缺道消寔由於此朕纂承
洪緒思弘大訓將欲尊師重道用闡厥繇講信
修睦敦獎名教方今區宇平壹文軌攸同十步
之內必有芳草四海之中豈無孝秀諸在家及
見入學者若有篤志好古耽典悅禮學行優敏
堪膺時務所在採訪具以名聞即當隨其器能
擢以不次若研精經術未願進仕可依其藝業
深淺門蔭高卑雖未升朝竝量準給祿庶夫恂

恂誘善不日成器濟濟盈朝何遠之有其國子
等學亦宜申明舊制教習生徒具為課試之法
以盡砥礪之道八月壬寅上御龍舟幸江都以
左武衛大將軍郭衍為前軍右武衛大將軍李
景為後軍文武官五品已上給樓船九品以上
給黃筏舳舻相接二百餘里冬十月己丑赦江
淮已南揚州給復五年舊總管內給復三年十
一月己未以大將軍崔仲方為禮部尚書

二年春正月辛酉東京成賜監督者有差以太

理卿梁毗為刑部尚書丁卯遣十使併省州縣
二月景戌詔尚書令楊素吏部尚書牛弘大將
軍宇文愷內史侍郎虞世基禮部侍郎許善心
制定輿服始備輦輅及五時副車上常服皮弁
十有二琪文官弁服珮玉五品已上給犢車通
幘三公親王加油絡武官平巾幘袴褶三品已
上給袍槩下至胥吏服色各有差非庶人不得
戎服戊戌置都尉官三月庚午車駕發江都先
是太府少卿何稠太府丞雲定興盛修儀仗於

是課州縣送羽毛百姓求捕之網羅被水陸禽
獸有堪斃眊之用者殆無遺類至是而成夏四
月庚戌上自伊闕陳法駕備千乘萬騎入於東
京辛亥上御端門大赦天下免今年租賦癸丑
以冀州刺史楊文思為民部尚書五月甲寅金
紫光祿大夫兵部尚書李通坐事免乙卯詔曰
旌表先哲式在饗祀所以優禮賢能顯彰遺愛
朕永鑒前修尚想名德何嘗不興歎九原屬懷
千載其自古以來賢人君子有能樹聲立德佐

世匡時博利殊功有益於人者並宜營立祠宇
以時致祭墳壟之處不得侵踐有司量為條式
稱朕意焉六月壬子以尚書令太子太師楊素
為司徒進封豫章王暕為齊王秋七月癸丑以
衛尉卿衛玄為工部尚書庚申制百官不得計
考增級必有德行功能灼然顯著者擢之壬戌
擢藩邸舊臣鮮于羅等二十七人官爵有差甲
戌皇太子昭薨乙亥上柱國司徒楚國公楊素
薨八月辛卯封皇孫倓為燕王侗為越王侑為

代王九月乙丑立秦王俊子浩為秦王冬十月
戊子以靈州刺史段文振為兵部尚書十二月
庚寅詔曰前代帝王因時創業君民建國禮尊
南面而歷運推移年代永久丘壟殘毀樵牧相
趨塋兆堙蕪封樹莫辨興言淪滅有愴于懷曰
古以來帝王陵墓可給隨近十戶蠲其雜役以
供守視

三年春正月癸亥敕并州逆人已流配而逃亡
者所獲之處即宜斬決景子長星竟天出於東

壁二旬而止。是月武陽郡士言河水清。二月己丑彗星見於東井。文昌歷大陵。五車北河入太微。掃帝座前後百餘日而止。三月辛亥車駕還京師。壬子以大將軍姚辨為左衛將軍。癸丑遣羽騎朱寬使於流求國。乙卯河間王弘薨。夏四月庚辰詔曰：古者帝王觀風俗，皆所以憂勤兆庶。安集遐荒，自蕃夷內附，未遑親撫。山東經亂，復加存恤。今欲安輯河北，巡省趙魏，所可依式。甲申頒律令，大赦天下。關內給復三年。壬辰改

州為郡，改度量衡，竝依古式。改上柱國以下官為大夫。甲午詔曰：天下之重，非獨理所安。帝王之功，豈一士之略。自古明君哲后，立政經邦，何嘗不選賢與能，振拔淹滯。周稱多士，漢號得人。尚想前風，載懷欽佇。朕負辰夙興，冕旒待旦。引領巖谷，寘以周行。冀與羣才，共康庶績。而彙茅寂漠，投竿罕至。豈美璞韜采未值，良工將介石在懷。確乎難拔，永鑒前哲。無然興歎。凡厥在位，譬諸股肱。若濟巨川，義同舟楫。豈得保茲寵祿。

晦尔所知優游卒歲甚非謂也。祁大夫之舉善
良史以為至公。臧文仲之蔽賢。尼父譏其竊位。
求諸往古。非無褒貶。宜思進善。用匡寡薄。夫孝
悌有聞。人倫之本。德行敦厚。立身之基。或節義
可稱。或操履清潔。所以激貪厲俗。有益風化。強
毅正直。執憲不撓。學業優敏。文才美秀。竝為廊
廟之用。寔乃瑚璉之資。才堪將略。則拔之以禦
侮。力有驍壯。則任之以爪牙。爰及一藝可取。亦
宜採錄。若眾善畢舉。與時無棄。以此求理。庶幾

非遠。文武有職事者。五品已上。宜依令。十科舉
人。有一於此。不必求備。朕當待以不次。隨才升
用。其見任九品已上官者。不在舉送之限。景申
車駕北巡狩。丁酉。以刑部尚書宇文弼為禮部
尚書。戊戌。敕百司不得踐暴禾稼。其有須開為
路者。有司計地所收。即以近倉酬賜。務從優厚。
己亥。至赤岸澤。以太牢祭。故太師李穆。五月丁
巳。突厥啓人可汗遣子拓特勒來朝。戊午。發河
北十餘郡丁男。自太行山達于并州。以通馳道。

景寅啓民可汗遣其兄子毗黎伽特勒來朝辛酉啓人可汗使請自入塞奉迎輿駕上不許癸酉有星孛于文昌上将星常皆動搖六月辛巳獵於連谷丁亥詔曰聿追孝饗德莫至焉崇建寢廟禮之大者然則質文異代損益殊時學滅坑焚經典散逸憲章湮墜廟堂制度師說不同所以世數多少莫能是正連室異宮亦無定准朕獲奉祖宗欽承景業永惟嚴配臬隆大典於是詢謀在位博訪儒術咸以為高祖文皇帝受

天明命奄有區夏拯羣飛於四海革彫弊於百王恤獄緩刑生靈皆遂其性輕徭薄賦比屋各安其業芟夷宇宙混壹車書東漸西被無思不服南征北怨俱荷來蘇駕毛毳乘風歷代所不至辨髮左衽聲教所罕及莫不厥角關塞頓穎闕庭譯靡絕時書無虛月韜戈偃伯天下晏如嘉瑞休徵表裏禔福猗歟偉歟無得而名者也朕又聞之德厚者流光理辨者禮縟是以周之文武漢之高光其典章特立謚号斯重豈非緣情

稱述即崇顯之義乎高祖文皇帝宜別建廟宇
以彰巍巍之德仍遵月祭用表蒸蒸之懷有司
以時創造務合典制又名位既殊禮亦異等天
子七廟事著前經諸侯二昭義有差降故知以
多為貴王者之禮今可依用昭厥後昆戊子次
榆林郡丁酉啓人可汗來朝己亥吐谷渾高昌
竝遣使貢方物甲辰上御北樓觀漁于河以宴
百寮秋七月辛亥啓人可汗上表請變服襲冠
帶詔啓人贊拜不名在諸侯王上甲寅上於郡

城東御大帳其下備儀衛建旌旗宴啓人及其
部落三千五百人奏百戲之樂賜啓人及其部
落各有差丙子殺光祿大夫賀若弼禮部尚書
宇文弼太常卿高頴尚書左僕射蘇威坐事免
發丁男百餘萬築長城西距榆林東至紫河二
旬而罷死者十五六八月壬午車駕發榆林乙
酉啓人飾廬清道以候乘輿帝幸其帳啓人奉
觴上壽宴賜極厚上謂高麗使者曰歸語尔王
當早來朝見不然者吾與啓人巡彼土矣皇后

亦幸義城公主帳己丑啓人可汗歸蕃癸巳入
樓煩關壬寅次太原詔營晉陽宮九月己未次
濟源幸御史大夫張衡宅宴飲極歡己巳至于
東都壬申以齊王暕為河南尹開府儀同三司
癸酉以戶部尚書楊文思為納言

四年春正月乙巳詔發河北諸郡男女百餘萬
開永濟渠引沁水南達于河北通涿郡庚戌百
寮大射於允武殿丁卯賜城內居民米各十石
壬申以太府卿元壽為內史令鴻臚卿楊玄感

為禮部尚書癸酉以工部尚書衛玄為右武侯
大將軍大理卿長孫熾為戶部尚書二月己卯
遣司朝謁者崔毅使突厥處羅致汗血馬三月
辛酉以將作大匠宇文愷為工部尚書壬戌百
濟倭赤土迦羅含國竝遣使貢方物乙丑車駕
幸五原因出塞巡長城景寅遣屯田主事常駿
使赤土致羅巔夏四月景午以離石之汾源臨
泉鴈門之秀容為樓煩郡起汾陽宮癸丑以河
內太守張定和為左屯衛大將軍乙卯詔曰突

厥意利珍豆落人可汗率領部落保附關塞遵
 奉朝禮思改戎俗頻入謁覲屢有陳請以氈牆
 毳幕事窮荒陋上棟下宇願同比屋誠心懇切
 朕之所重宜於萬壽成置城造屋其帷帳牀褥
 以上隨事量給務從優厚稱朕意焉五月壬申
 蜀郡獲三足鳥張掖獲玄狐各一秋七月辛巳
 發丁男二十餘萬築長城自榆林谷而東乙未
 左翊衛大將軍宇文述破吐谷渾於曼頭赤水
 八月辛酉親祠恒岳河北道郡守畢集大赦天

下駕所經郡縣免一年租調九月辛未徵天
 下鷹師悉集東京至者萬餘人戊寅彗星出五
 車掃文昌至房而滅辛巳詔免長城役者一年
 租賦冬十月景午詔曰先師尼父聖德在躬誕
 發天縱之姿憲章文武之道命世膺期蘊茲素
 王而頽山之歎忽踰於千祀盛德之美不在於
 百代永惟懿範宜有優崇可立孔子後為紹聖
 侯有司求其苗裔錄以申上辛亥詔曰昔周王
 下車首封唐虞之胤漢帝承曆亦命殷周之後

萬曆二十一年刊
 七
 五

皆所以褒立先代憲章在昔朕嗣膺景業仿求
雅訓有一弘益欽若令典以為周兼夏殷文質
大備漢有天下車書混一魏晉沿襲風流未遠
竝宜立後以存繼絕之義有司可求其冑緒列
聞乙卯頒新式於天下

五年春正月景子改東京為東都癸未詔天下
均田戊子上自東都還京師己丑制民間鐵義
搭鈎積刃之類皆禁絕之太守每歲密上屬官
景迹二月戊戌次于閔鄉詔祭古帝王陵及開

皇功臣墓庚子制漢魏周官不得為蔭辛丑赤
土國遣使貢方物戊申車駕至京師景辰宴耆
舊四百人於武德殿頒賜各有差己未上御崇
德殿之西院愀然不悅顧謂左右曰此先帝所
居寔用增感情所未安於此院之西別營一殿
壬戌制父母聽隨子之官三月己巳車駕西巡
河右庚午有司言武功男子史永遵與從父昆
弟同居上嘉之賜物一百段米二百石表其門
閭乙亥幸扶風舊宅夏四月己亥大獵於隴西

壬寅高麗吐谷渾伊吾竝遣使來朝乙巳次狄
道党項羌來貢方物癸亥出臨津關度黃河至
西平陳兵講武五月乙亥上大獵於延山長圍
周亘二千里庚辰入長寧谷壬午度星嶺甲申
宴群臣於金山之上景戌梁浩豐御馬度而橋
壞斬朝散大夫黃亘及督役者九人吐谷渾主
率衆保覆袁川帝分命內史元壽南屯金山兵
部尚書段文振北屯雪山太僕卿楊義臣東屯
琵琶峽將軍張壽西屯泥嶺四面圍之吐谷渾

主伏允以數十騎遁出遣其名王詐稱伏允保
車我真山壬辰詔右屯衛大將軍張定和往捕
之定和挺身挑戰為賊所殺亞將柳武建擊破
之斬首數百級甲午其仙頭王窮蹙率男女千
餘萬口來降六月丁酉遣左光祿大夫梁默右
翊衛將軍李瓊等追吐谷渾主皆遇賊死之癸
卯經大斗拔谷山路隘險魚貫而出風霰晦暝
與後宮相失士卒凍死者大半景午次張掖辛
亥詔諸郡學業該通才藝優洽膂力驍壯超絕

等倫在官勤奮堪理政事立性正直不避強禦
四科舉人壬子高昌王麴伯雅來朝伊吾吐屯
設等獻西域數千里之地上大悅癸丑置西海
河源鄯善且末等四郡景辰上御觀風行殿盛
陳文物奏九部樂設魚龍曼延宴高昌王吐屯
設於殿上以寵異之其蠻夷陪列者三十餘國
戊午大赦天下開皇已來流配悉放還鄉晉陽
逆黨不在此例隴右諸郡給復三年秋七月丁
卯置馬牧於青海渚中以求龍種無效而止九

月癸未車駕入長安冬十月癸亥詔曰優德尚
齒載之典訓尊事乞言義彰膠序嚮熊為師無
取筋力方叔元老克壯其猷朕永言稽古用求
至理是以尨眉黃髮更令收叙務簡秩優無虧
藥餌庶等臥理佇其弘益今歲耆老赴集者可
於近郡處置年七十已上疾患沈滯不堪居職
即給賜帛送還本郡其官至七品已上者量給
稟以終厥身十一月景子車駕幸東都
六年春正月癸亥朔旦有盜數十人皆素冠練

衣焚香持華自稱彌勒佛入自建國門監門者
皆稽首既而奪衛士仗將為亂齊王暕遇而斬
之於是都下大索與相連坐者千餘家丁丑角
觥大戲於端門街天下奇伎異藝畢集終月而
罷帝數微服往觀之己丑倭國遣使貢方物二
月乙巳武賁郎將陳稜朝請大夫張鎮州擊流
求破之獻俘萬七千口頒賜百官乙卯詔曰夫
帝圖草創王業艱難咸依股肱叶同心德用能
救厥頽運克膺大寶然後疇庸茂賞開國承家

誓以山河傳之不朽近代凋喪四海未壹茅土
妄假名實相乖歷茲永久莫能懲革皇運之初
百度伊始猶循舊貫未暇改作今天下交泰文
軌攸同宜率遵先典永垂大訓自今已後唯有
功勳乃得賜封仍令子孫承襲景辰改封安德
王雄為觀王河間王子慶為郇王庚申徵魏齊
周陳樂人悉配太常三月癸亥幸江都宮甲子
以鴻臚卿史祥為左驍衛大將軍夏四月丁未
宴江淮已南父老頒賜各有差六月辛卯室韋

赤土竝遣使貢方物壬辰鴈門賊帥尉文通聚
衆三千保於莫壁谷遣鷹揚楊伯泉擊破之甲
寅制江都太守秩同京尹冬十月壬申刑部尚
書梁毗卒壬子戶部尚書銀青光祿大夫長孫
熾卒十二月己未左光祿大夫吏部尚書牛弘
卒辛酉朱崖人王万昌舉兵作亂遣隴西太守
韓洪討平之

七年春正月壬寅左武衛大將軍光祿大夫真
定侯郭衍卒二月乙未上升鈞臺臨揚子津大

宴百寮頒賜各有差庚申百濟遣使朝貢乙亥
上自江都御龍舟入通濟渠遂幸于涿郡壬午
詔曰武有七德先之以安民政有六本興之以
教義高麗虧失藩禮將欲問罪遼左恢宣勝略
雖懷伐國仍事省方今往涿郡巡撫民俗其河
北諸郡及山西山東年九十已上版授太守八
十者授縣令三月丁亥右光祿大夫左屯衛大
將軍姚辯卒夏四月庚午幸涿郡之臨朔宮五
月戊子以武威太守樊子蓋為民部尚書秋大

水山東河南漂沒三十餘郡民相賣為奴婢冬
十月乙卯底柱山崩偃木逆流數十里戊午以
東平太守吐万緒為左屯衛大將軍十二月己
酉突厥處羅多利可汗來朝帝大悅接以殊禮
于時遼東戰士及餽運者填咽於道晝夜不絕
苦役者始為羣盜甲子敕都尉鷹揚與郡縣相
知追捕隨獲斬決之

八年春正月辛巳大軍集于涿郡以兵部尚書
段文振為左候衛大將軍壬午下詔曰天地大

德降繁霜於秋令聖哲至仁者兵甲於刑典故
知造化之有肅殺義在無私帝王之用干戈蓋
非獲已版泉丹浦莫匪龔行取亂覆昏咸由順
動况乎甘野誓師夏啓承大禹之業商郊問罪
周發成文王之志永監載籍屬當朕躬粵我有
隋誕膺靈命兼三才而建極一六合而為家提
封所漸細柳蟠桃之外聲教爰暨紫舌黃枝之
域遠至邇安罔弗和會功成理定於是乎在而
高麗小醜迷昏不恭崇聚勃碣之間存食遼獫

之境雖復漢魏誅夷巢窟暫擾亂離多阻種落
還集萃川數於前代播寔繁以迄今睽彼華壤
翦為夷類歷年永久惡稔既盈天道禍淫亡徵
已兆亂常敗德非可勝圖掩慝懷姦惟日不足
移告之嚴未嘗面受朝覲之禮莫肯躬親誘納
亡叛不知紀極充斥邊垂亟勞烽候關柵以之
不靜三人為之廢業在昔薄伐已漏天網既緩
前禽之戮未即後服之誅曾不懷恩翻其長惡
乃兼契丹之黨虔劉海戍習鞞鞞之服侵軼遼

西又青丘之表咸脩職貢碧海之濱同稟正朔
遂復寇攘琛寶遏絕往來虐及弗辜誠而遇禍
軺軒奉使爰暨海東旌節所次途經藩境而擁
塞道路拒絕王人無事君之心豈為臣之禮此
而可忍孰不可容且法令苛酷賦歛煩重疆臣
豪族咸執國均朋黨比周以之成俗蒲貨如市
冤枉莫申重以仍歲災凶比屋飢饉兵戈不息
徭役無期力竭轉輸身填溝壑百姓愁苦爰誰
適從境內哀惶不勝其弊回面內向各懷性命

之圖黃髮稚齒咸興酷毒之歎省俗觀風爰屆
幽朔弔人問罪無俟再駕親總六師用申九伐
拯厥阡危協從天意殄茲逋穢克嗣先謨今宜
授律啓行分麾屆路掩勅解而雷震及夫餘以
電掃比戈按甲俟誓而後行先令五申必勝而
後戰左道一軍可鏤方道第二軍可長岑道第
三軍可海冥道第四軍可蓋馬道第五軍可建
安道第六軍可南蘇道第七軍可遼東道第八
軍可玄兔道第九軍可扶餘道第十軍可朝鮮

道第十一軍可沃沮道第十二軍可樂浪道右
第一軍可粘蟬道第二軍可含資道第三軍可
渾彌道第四軍可臨屯道第五軍可候城道第
六軍可提奚道第七軍可踏頓道第八軍可肅
慎道第九軍可碣石道第十軍可東脩道第十
一軍可帶方道第十二道可襄平道凡此衆軍
先奉廟略駱驛引途總集平壤莫非如豺如貔
之勇百戰百勝之雄顧眄則山岳傾頽叱咤則
風雲騰鬱腹心攸同爪牙斯在朕躬馭元戎為

必軍

其節度涉遼而東循海之右解倒懸於遐裔問
疾苦於遺黎其外輕齎游闕隨機赴響卷甲銜
枚出其不意又滄海道軍舟艦千里高颿電逝
巨艦雲飛橫斷沮江逕造平壤島嶼之望斯絕
坎井之路已窮其餘被髮左衽之人控弦待發
微盧彭濮之旅不謀同辭杖順臨逆人百其勇
以此衆戰勢等摧枯然則王者之師義存止殺
聖人之教必也勝殘天罰有罪本在元惡人之
多辟脅從罔理若高元泥首棘門自歸司寇即

解縛焚櫬弘之以恩其餘臣人願歸朝奉化咸
加慰撫各安生業隨才任用無隔夷夏營壘所
次務在整肅芻蕘有禁秋毫勿犯以布恩宥以
喻禍福若其同惡相濟抗拒官府國有常刑俾
無遺類明加曉示稱朕意焉總一百一十三萬
三千八百名二百萬其餽運者倍之癸未第一
軍發終四十日引師乃盡旌旗亘千里近古出
師之盛未之有也乙未以右候衛大將軍衛玄
為刑部尚書甲辰內史令元壽卒二月甲寅詔

曰朕觀風燕裔問罪遼濱文武出力爪牙思奮
莫不執銳勤王捨家從役罕蓄倉廩之資兼捐
播殖之務朕所以夕惕愀然慮其匱乏雖復素
飽之衆情在忘私悅使之徒宜從其厚諸行從
一品以下依飛募人以上家口郡縣宜數存問
若有糧食乏少皆賑給之或雖有田疇貧弱不
能自耕種可於多丁富室勸課相助使夫居者
有歛積之豐行役無顧後之慮壬戌司空京兆
尹光祿大夫觀王雄薨三月辛卯兵部尚書左

候衛大將軍段文振卒癸巳上御師甲子臨戎
于遼水橋戊戌大軍為賊所拒不果濟右屯衛
大將軍左光祿大夫麥鐵杖武貴郎將錢士雄
孟金又等皆死之甲午車駕度遼大戰于東岸
擊賊破之進圍遼東乙未大頓見二大鳥高丈
餘觸身朱足游泳自若上異之命工圖寫并立
銘頌五月戊午納言楊達卒于時諸將各奉旨
不敢越機既而高麗各固城守攻之不下六月
己未幸遼東責怒諸將止城西數里御六合城

七月壬午宇文述等敗績于薩水右屯衛將軍
薛世雄死之九軍竝陷師奔還亡者千餘騎癸
卯班師九月庚辰上至東都已丑詔軍國異容
文武殊用匡危拯難則霸德攸興化人成俗則
王道斯貴時當撥亂屠販可以登朝世屬隆平
經術然後升仕豐都爰肇儒服無預於周行建
武之朝功臣不參於吏職自三方未一四海交
爭不遑文教唯尚武功設官分職罕以才授班
朝理人乃由勳叙莫非拔足行陣出自勇夫學

數之道既所不習政事之方故亦無取是非暗
於在已威福專於下吏貪冒貨賄不知紀極蠹
政害民寔由於此自今已後諸授勳官者竝不
得回授文武職事庶遵彼更張取類於調瑟求
諸名製不傷於美錦若吏部輒擬用者御史即
宜糾彈冬十月戊寅工部尚書宇文愷卒十一
月己卯以宗女華容公主嫁于高昌王辛巳光
祿大夫韓壽卒甲申敗將宇文述于仲文等除
名為民斬尚書右丞劉士龍以謝天下是歲大

旱疫人多死山東尤其密詔江淮南諸郡閱視民間童女姿質端麗者每歲貢之

九年春正月丁丑徵天下兵募民為驍果集于涿郡壬午賊帥杜彥永王潤等陷平原郡大掠而去辛卯置折衝果毅武勇雄武等郎將官以領驍果乙未平原李德逸聚眾數萬稱阿舅賊劫掠山東靈武白榆妄稱奴賊劫掠牧馬北連突厥隴右多被其患遣將軍范貴討之連年不能克戊戌大赦乙亥遣使王侑刑部尚書衛玄

鎮京師辛丑以右驍衛將軍季渾為右驍衛大將軍二月己未濟北人韓進洛聚眾數萬為羣盜壬午復宇文述等官爵又徵兵討高麗二月景子濟北人孟海公起兵為盜眾至數萬丁丑發丁男十萬城太興戊寅幸遼東以越王侗工部尚書樊子蓋鎮東都庚子北海人郭方預聚徒為賊自号盧公眾至三萬攻陷郡城大掠而去夏四月庚午車駕度遼壬申遣宇文述楊義臣趣平壤城五月丁丑熒惑入南斗己卯濟北

人甄寶車聚眾萬餘寇掠城邑六月乙巳禮部尚書楊玄感反於黎陽丙辰玄感逼東都河南贊理裴弘策拒之反為賊所敗戊辰兵部侍郎斛斯政奔于高麗庚午上班師高麗犯後軍敕右武衛大將軍李景為後拒遣左翊衛大將軍宇文述左候衛將軍屈突通等馳傳發兵以討玄感秋七月己卯令所在發人城縣府邑癸未餘杭人劉元進舉兵反眾至數萬八月壬寅左翊衛大將軍宇文述等破楊玄感於閩鄉斬之

餘黨悉平癸未吳人朱燮晉陵人管崇擁眾十萬餘自稱將軍寇江左甲辰制驍果之家蠲免賦役丁未詔郡縣城去道過五里已上者徙就之戊申制盜賊籍沒其家乙卯賊帥陳琪等三萬攻陷信安郡辛酉司農卿光祿大夫葛國公趙元淑以罪伏誅九月己卯濟陰人吳海流東海人彭孝才並舉兵為盜眾數萬庚辰賊帥孫慧尚聚眾四萬陷蒼梧郡甲午車駕次上谷以供費不給上大怒免太守虞衍等官丁酉東陽

人李三兒向但子舉兵作亂衆至萬餘閏月己巳幸博陵庚午上謂侍臣曰朕昔從先朝周旋於此年甫八歲日月不居倏經三紀追惟曩昔不可復希言未卒流涕嗚咽侍衛者皆泣下沾襟冬十月丁丑賊帥呂明星率衆數千圍東郡武賁郎將曹芳擊斬之乙酉詔曰博陵昔為定州地居衝要先王歷試所基王化斯遠故以道冠幽風義高姚邑朕巡撫庶爰屆茲邦瞻望郊壘緬懷敬止思所以宣播慶澤覃被下人

崇紀顯號式光今緒可改博陵為高陽郡赦境內死罪以下給復一年於是召高祖時故吏皆量才授職壬辰以納言蘇威為開府儀同三司朱熒管崇推劉元進為天子遣將軍吐方緒魚俱羅討之連年不能剋齊人孟讓王薄等衆十餘萬據長白山攻剽諸郡清河賊張金稱衆各數萬勃海賊帥格謙自號燕王孫宣雅自號齊王衆各十萬山東苦之丁亥以右候衛將軍郭榮為右候衛大將軍十一月己酉右候衛將軍

馮孝慈討張金稱於清河反為所敗孝慈死之
十二月甲辰車裂楊玄感弟朝散大夫積善及
黨與十餘人仍焚而揚之丁亥扶風人向海明
舉兵作亂稱皇帝建元白鳥遣太僕卿楊義臣
擊破之

十年春正月甲寅以宗女為信義公主嫁於突
厥曷娑那可汗二月辛未詔百寮議伐高麗數
日無敢言者戊子詔曰竭力王役致身戎事成
由徇義莫匪勤誠委命草芥暴骸原野與言念

之每懷愍惻往年問罪將屆遼濱廟筭勝略具
有進止而諒昏凶罔識成敗高煩悞恨本無智
謀臨三軍由兒戲視人命如草芥不遵成規坐
貽撓退遂令死亡者眾不及埋藏今宜遣使人
分道收葬設祭於遼西郡立道場一所恩加泉
壤庶弭窮魂之寃澤及枯骨用弘仁者之惠辛
卯詔曰黃帝五十二戰成湯二十七征方乃德
施諸侯令行天下盧芳小盜漢祖尚且親戎隗
囂餘燼光武猶自登隴豈不欲除暴止戈勞而

後逸者哉朕纂承寶業君臨天下日月所照風
雨所霑孰非我臣獨隔聲教最尔高麗僻居荒
裔鷓張狼噬侮慢不恭抄竊我邊乘侵逼我城
鎮是以去歲出軍問罪遼碣殪長蛇於玄菟戮
封豕於襄平扶餘衆軍風馳電逝追奔逐北徑
踰涇水滄海舟楫衝賊腹心焚其城郭汙其宮
室高元伏鑕泥首送款軍門尋請入朝歸罪司
寇朕以許其改過乃詔班師而長惡靡悛宴安
鳩毒此而可忍孰不可容便可分命六司百道

俱進朕當親執武節臨御諸軍秣馬九都觀兵
遼水順天誅於海外拯窮民於倒懸征伐以正
之明德以誅之止除元惡餘無所問若有識存
亡之分悟安危之機翻然北首自求多福必其
同惡相濟抗拒王師若火燎原刑茲無赦有司
便宜宣布咸使知聞丁酉扶風人唐弼舉兵反
衆十萬推李弘為天子自稱唐王三月壬子行
幸涿郡癸酉次臨渝宮親御戎服禡祭黃帝斬
叛軍者以釁鼓夏四月辛未彭城賊張大彪聚

衆數萬保縣薄山為盜遣榆林太守董純擊破
斬之甲午車駕次北平五月庚子詔舉郡孝悌
廉潔各十人壬寅賊帥宋世謨陷琅邪庚申延
安人劉迦論舉兵反自稱皇王建元大世六月
辛未賊帥鄭文雅林寶護等衆三萬陷建安郡
太守楊景祥死之秋七月癸丑車駕次懷遠鎮
乙卯曹國遣使貢方物甲子高麗遣使請降囚
送斛斯政上大悅八月己巳班師右衛大將軍
左光祿大夫鄭榮卒冬十月丁卯上至東都已

丑還京師十一月景申支解斛斯政於金光門
外乙巳有事於南郊己酉賊帥司馬長安破長
平郡乙卯離石胡劉苗王舉兵反自稱天子以
其第六兒為永安王衆至數萬將軍潘長文討
之不能剋是月賊帥王德仁擁衆數萬保林慮
山為盜十二月壬申上如東都其日大赦天下
戊子入東都庚寅賊帥孟讓衆十餘萬據都梁
宮遣江都丞王世充擊破之盡虜其衆

十一年春正月甲午朔宴百寮突厥新羅靺鞨

畢大辭訶吐傳越烏那曷波臘吐火羅俱慮建
忽論靺鞨訶多沛汗龜茲疏勒于闐安國曹國
何國穆國畢衣密失範延伽折契丹等國並遣
使朝貢戊戌武賁郎將高建毗破賊帥顏宣政
於齊郡虜男女數千口乙卯大會蠻夷設魚龍
曼延之樂頒賜各有差二月戊辰賊帥楊仲緒
等率眾萬餘攻北平滑公李景破斬之庚午詔
曰設險守國著自前經重門禦暴事彰往策所
以宅上寧邦禁邪固本而近代戰爭居人散逸

田疇無伍郭郭不修遂使遊惰寔繁寇攘未息
今天下平一海內晏如宜令人悉城居田隨近
給使強弱相容力役兼濟穿窬無所厝其姦究
翟蒲不得聚其逋逃有司具為事條務令得所
景子王須拔反自稱漫天王國號燕賊帥魏刀
兒自稱歷山飛眾各十餘萬北連突厥南寇趙
三月丁酉殺右驍衛大將軍光祿大夫戚公李
渾將作監光祿大夫李敏並族滅其家癸卯賊
帥司馬長安破西河己酉幸太原避暑汾陽宮

秋七月己亥淮南人張起緒舉兵為盜衆至三萬辛丑光祿大夫右禦衛大將軍張壽卒八月乙卯巡北塞戊辰突厥始畢可汗率騎數十萬謀襲乘輿義成公主遣使告變壬申車駕馳幸鴈門癸酉突厥圍城官軍頻戰不利上大懼欲率精騎潰圍而出民部尚書樊子蓋固諫乃止齊王暕以後軍保于崞縣甲申詔天下諸郡募兵於是守令各來赴難九月甲辰突厥解圍而去丁未曲赦太原鴈門死罪已下冬十月壬戌

上至于東都丁卯彭城人魏麒麟聚衆萬餘為盜寇魯郡壬申賊帥盧明月聚衆十餘萬寇陳汝間東海賊李子通擁衆度淮自號楚王建元明政寇江都十一月乙卯賊帥王須拔破高陽郡十二月戊寅有大流星如斛隆明月營破其衝車庚辰詔民部尚書樊子蓋發關中兵討絳郡賊敬盤阬柴保昌等經年不能剋譙郡人朱粲擁衆數十萬寇荆襄僭稱楚帝建元昌達漢南諸郡多為所陷焉

十二年春正月甲午鴈門人翟松柏起兵於靈
丘衆至數萬轉攻傍縣二月己未真臘遣使貢
方物甲子夜有二大鳥似鷗飛入大業殿止于
御幄至明而去癸亥東海賊盧公暹率衆萬餘
保于蒼山夏四月丁巳顯陽門灾癸亥魏刁兒
所部將甄翟兒號歷山飛衆十萬轉寇太原將
軍潘長文討之反為所敗長文死之五月景戌
朔日有蝕之既癸巳大流星殞於吳郡為石壬
午上於景華宮徵求螢火得數斛夜出遊山而

放之光遍巖谷秋七月壬戌民部尚書光祿大
夫濟北公樊十蓋卒甲子幸江都宮以越王侗
光祿大夫段達太府卿元文都檢校民部尚書
韋津右武衛將軍皇甫無逸右司郎盧楚等總
留守事奉信郎崔民象以盜賊充斥於建國門
表諫不宜巡幸上大怒先解其頤乃斬之戊辰
馮翊人孫華自號總管舉兵為盜高涼通守洗
瑤徹舉兵作亂嶺南溪洞多應之己巳熒惑守
羽林月餘乃退車駕次汜水奉信郎王愛仁以

強賊日盛諫上請還西京上怒斬之而行八月
乙巳賊帥趙方海眾數十萬自恒山寇高陽壬
子有大流星如斗出王良閣道聲如壞牆癸丑
大流星如甕出羽林九月丁酉東海人杜伏威
楊州沈覓敵等作亂眾至數萬右禦衛將軍陳
稜擊破之戊午有二枉矢出北斗魁委曲蛇形
注於南斗壬戌安定人荔非世雄殺臨涇令舉
兵作亂自號將軍冬十月己丑開府儀同三司
左翊衛大將軍光祿大夫許公宇文述薨十二

月癸未鄱陽賊操天成舉兵反自號元興王建
元始興攻陷豫章郡乙酉以右翊衛大將軍來
護為開府儀同三司行左翊衛大將軍壬辰鄱
陽人林士弘自稱皇帝國號楚建元太平攻陷
九江廬陵郡唐公破甄翟兒于西河虜男女千
口

十三年春正月壬子齊郡賊杜伏威率眾度淮
攻陷歷陽郡景辰勃海賊竇建德設壇於河間
之樂壽自稱長樂正建元丁丑辛巳賊帥徐圓

北史本紀卷之三十一
三十一
朗率眾數千破東平郡弘化人到合戍聚眾萬
餘人為盜傍郡苦之二月壬午朔方人梁師都
殺郡丞唐世宗據郡反自稱大丞相遣銀青光
祿大夫張世隆擊之反為所敗戊子賊帥王子
英破上谷郡己丑馬邑校尉劉武周殺太守王
仁恭舉兵作亂北連突厥自稱定楊可汗庚寅
賊帥李密翟讓等陷興洛倉越王侗遣武賁郎
將劉長恭光祿少卿房胤擊之反為所敗死者
十五六庚子李密自號魏公稱元年開倉以賑

羣盜眾至數十萬河南諸郡相繼皆陷焉壬寅
劉武周破武賁郎將王智辯於桑乾鎮智辯死
之三月戊午廬江人張子路舉兵反遣右禦衛
將軍陳稜討平之丁丑賊帥李通德眾十萬寇
廬江左屯衛將軍張鎮州擊破之夏四月癸未
金城校尉薛舉率眾反自稱西秦霸王建元秦
與攻陷隴右諸郡己丑賊帥孟讓夜入東都外
郭燒豐都市而去癸巳李密陷迴洛東倉丁酉
賊帥房憲伯陷汝陰郡是月光祿大夫武賁郎

將裴仁基淮陽太守趙佗等竝以眾叛歸李密
五月辛卯夜有流星如甕墜於江都甲子唐公
起義師於太原景寅突厥數千寇太原唐公擊
破之秋七月壬子熒惑守積屍景辰武威人李
軌舉兵反攻陷河曲諸郡自稱涼王建元安樂
八月辛巳唐公破武牙郎將宋老生於霍邑斬
之九月己丑帝括江都人女寡婦以配從兵是
月武陽郡丞元寶藏以郡叛歸李密與賊帥李
文相攻陷黎陽倉慧星見於營室冬十月丁亥

太原陽世洛聚眾萬餘人寇掠城邑景申羅令
蕭銑以縣反鄱陽人董景珍以郡反迎銑於羅
縣號為梁王攻陷傍郡戊戌武賁郎將高毗敗
濟北郡賊甄寶車於豔山十一月景辰唐公入
京師辛酉遙尊帝為太上皇立代王侑為帝改
元義寧上起宮丹陽將遜于江左有烏鵲來巢
幄帳驅不能止熒惑犯太微有石自江浮入于
揚子日光四散如流血上甚惡之二年三月右
屯衛將軍宇文化及武賁郎將司馬德戡元禮

監門直閣裴虔通將作少監宇文智及武勇郎
將趙行樞鷹揚郎將孟景內史舍人元敏符璽
郎李覆牛方裕千牛左右李孝本弟孝質直長
許弘仁薛世良城門郎唐奉義醫正張愷等以
驍果作亂入犯宮闈上崩于温室時年五十蕭
后令宮人撤牀簀為棺以埋之化及發後右禦
衛將軍陳稜奉梓宮於成象殿葬吳公臺下發
斂之始容貌若生衆咸異之大唐平江南之後
改葬雷塘初上自以蕃王次不當立每矯情飾

行以釣虛名陰有奪宗之計時高祖雅重文獻
皇后而性忌妾媵皇太子勇內多嬖幸以此失
愛帝後庭有子皆不育之示無私寵取媚於后
大臣用事者傾心與交中使至第無貴賤皆曲
承顏色申以厚禮婢僕往來者無不稱其仁孝
又常私入宮掖密謀於文獻后楊素等因機構
扇遂成廢立自高祖大漸暨諒闇之中蒸淫無
度山陵始就即事巡游以天下承平日久士馬
全盛慨然慕秦皇漢武之事乃盛理宮室窮極

侈靡召募行人分使絕域諸蕃至者厚加禮賜
有不恭命以兵擊之盛興屯田於玉門柳城之
外課天下富室分道市武馬疋直十餘萬富強
坐是而凍餒者十家而九性多詭譎所幸之處
不欲人知每幸之所輒數道置頓四海珍羞殊
味水陸必備焉求市者無遠不至郡縣官人競
為獻食豐厚者進擢踈儉者獲罪姦吏侵漁內
外虛竭頭會箕斂人不聊生于時軍國多務日
不暇給帝方驕怠惡聞政事冤屈不理奏請罕

決又猜忌臣下無所專任朝臣有不合意者必
構其罪而族滅之而頰賀若弼先皇心膂參謀
帷幄張衡李金才潘邱惟舊績著經綸惡其直
道忌其正議求其無形之罪加以丹頸之戮其
餘事君盡禮蹇蹇匪躬無辜無罪橫受夷戮者
不可勝紀政刑弛紊賄貨公行莫敢有言道路
以目六軍不息百役繁興行者不歸居者失業
人饑相食邑落為墟上弗之恤也東西行幸靡
有定居每以供費不給逆收數年之賦所至唯

與後宮流連耽湎惟日不足招迎媵媼朝夕共肆醜言又引少年令與宮人穢亂不軌不遜以為娛樂區宇之內盜賊蜂起劫掠從官屠陷城邑近臣互相掩蔽皆隱賊數不以實對或有言賊多者輒大被詰責各求苟免上下相蒙每出師徒敗亡相繼戰士盡力不加賞賜百姓無辜咸受屠戮蒸庶積怨天下土崩至於就禽而猶未之寤也

恭皇帝諱侑元德太子之子也母曰韋妃性聰

敏有氣度大業三年立為陳王後數載徙為代王及煬帝親征遼東令於京師總留事十一年從幸晉陽拜太原太守尋鎮京師義兵入長安尊煬帝為太上皇奉帝纂業義寧元年十一月壬戌上即皇帝位於大興殿詔曰王道喪亂天步不康屬之於朕逢此百罹襁褓之歲夙遭憫凶孺子之辰太上播越興言感動實疚于懷太尉唐公膺期作宰糾合義兵翼戴皇室爰奉明詔弼予幼沖顯命光臨天威咫尺對揚尊號悼

心失圖一人在遠三讓不遂僂俛南面厝身無
所苟利社稷莫敢或違俯從群議奉遵聖旨可
大赦天下改大業十三年為義寧元年十一月
十六日昧爽以前大辟罪已下皆赦除之常赦
所不免者不在赦限甲子以光祿大夫大將軍
太尉唐公為假黃鉞使持節大都督內外諸軍
事尚書令大丞相進封唐王景寅詔曰朕惟孺
子未出深宮太上遠巡追蹤穆滿時逢多難委
當尊極辭不獲召九恭已臨朝若涉大川罔知所

濟民之情偽曾未之聞賴股肱戮力上宰賢良
匡佐沖人輔其不逮軍國機務事無大小文武
設官位無貴賤憲章賞罰咸歸相府庶績其凝
責成斯屬已巳以唐王子隴西公建成為唐國
世子敦煌公為京兆尹改封秦公元吉為齊公
太原置鎮北府乙亥張掖康老和舉兵反十二
月癸未薛舉自稱天子寇扶風秦公為元帥擊
破之丁亥桂陽人曹武徹舉兵反建元通聖丁
酉義師禽驍衛大將軍屈突通於閩鄉乙巳賊

帥張善安陷廬江郡

二年春正月丁未詔唐王劔履上殿入朝不趨
贊拜不名加前後羽葆鼓吹壬戌將軍王世充
為李密所敗河內通守孟善誼武賁郎將王辨
楊威劉長恭梁德董智通皆死之庚戌河陽郡
尉獨孤武都降於李密三月景辰右屯衛將軍
宇文化及弒太上皇於江都宮右禦衛將軍獨
孤盛死之齊王暕趙王杲燕王倓右翊衛大將
軍宇文協內史侍郎虞世基御史大夫裴蘊給

事郎許善心皆遇害化及立秦王浩為帝自稱
大丞相朝士文武皆受其官爵光祿大夫宿公
麥木折衝郎將朝請大夫沈同謀討賊夜襲化
及營反為所害戊辰詔唐王備九錫之禮加璽
紱遠游冠綠綬綬位在諸侯王上唐國置丞相
已下一依舊式五月乙巳朔詔唐王冕十有二
旒建天子旌旗出警入蹕金根車駕備五特副
車置旄頭雲罕車儷八佾設鍾虞宮縣王后王
子王女爵命之號一遵舊典戊午詔曰天禍隋

國大行太上皇遇盜江都憫予小子哀號永感
仰惟荼毒仇復靡申相國唐王膺斯命世扶危
拯溺自北徂南東征西怨總九合於一匡決百
勝於千里糾率夷夏大庇氓黎保乂朕躬繫王
是賴德侔造化功格蒼旻兆庶歸心曆數斯在
屈為人臣載違天命當今九服崩離三靈改卜
大運去矣請避賢路私僮命駕須歸藩國予本
代王及予而代天之所廢豈期如是庶憑稽古
之聖以誅四凶幸值惟新之恩預充三恪雪冤

恥於皇祖守裡祀為孝孫朝聞夕殞及泉無恨
今遵故事遜於舊邸庶官群辟改事唐朝宜依
前典趣上尊號若釋重負感泰兼懷假手真人
俾除醜逆仍敕有司凡有表奏皆不得以聞是
日上遜位於大唐以為鄗國公武德二年夏五
月崩時年十五

史臣曰煬帝爰在弱齡早有志尚南平吳會北
却匈奴昆弟之中獨著聲績於是矯情飾兒肆
厥姦回故得獻后鍾心文皇革慮天方肇亂遂

升儲兩踐峻極之榮基承不顯之休命地廣三代威振八紘單于頓顙越常重譯赤仄之泉流溢于都內紅腐之粟充積于塞下負其富強之資思逞無厭之欲狹殷周之制度尚秦漢之規摹恃才矜己傲很明德內懷險躁外示疑簡盛冠服以塞其姦除諫官以掩其過淫荒無度法令滋彰教絕四維刑參五虐誅鋤骨肉屠剿忠良受賞者莫見其功為戮者莫聞其罪驕怒之兵屢動土木之功不息頻出朔方三駕遼左旌

旗萬里徵稅百端猾吏侵漁人不堪命乃急令暴賦以擾之嚴刑峻法以臨之甲兵威武以董之自是海內騷然無聊生矣俄而玄感肇黎陽之亂匈奴有鴈門之圍天子方棄中土遠之揚越姦宄乘豐強弱相陵關梁閉而不通皇輿往而莫返加之以師旅因之以飢饉流離道路轉死溝壑十七八焉於是相聚萑蒲蝟毛而起大則跨州連郡稱帝稱王小則千百為郡攻城剽邑流血成川澤死人如亂麻炊者不及析骸食

者不遑易子茫茫九土並為麋鹿之場悻悻黔
黎俱充蛇豕之餌四方萬里簡書相續猶謂鼠
竊狗盜不足為虞上下相蒙莫肯念亂振蟪蛄
之羽窮長夜之樂土崩魚爛貫盈惡稔晉天之
下莫匪仇讐左右之人皆為敵國終然不悟同
彼望夷遂以萬乘之尊死於匹夫之手億兆靡
感恩之士九牧無勤王之師子弟同就誅夷體
骨棄而莫掩社稷顛隕本枝殄絕自肇有書契
以迄于茲宇宙崩離生靈塗炭喪身滅國未有
若斯之甚也書曰天作孽猶可違自作孽不可
逭傳曰吉凶由人祇不妄作又曰兵猶火也不
戰將自焚觀隋室之存亡斯言有徵矣恭帝年
在幼冲遭家多難一人失德四海土崩羣盜逢
起豺狼塞路南巢遂往流彘不歸既鍾百六之
期躬踐數終之運謳歌有屬笙鍾變響雖欲不
遵堯舜之迹庸可得乎

甲寅年九月一日

皇極經世一

